

बिहारी  
के सात सौ तेरह दोहे एवं सोरठा

(दोहा)

मेरी भव - वाधा हरौ , राधा नागरि सोय ।  
जा तन की झाँई परै स्यामु हरित-दुति होय ॥१॥

अपने अँग के जानि कै जोबन - नृपति प्रबीन ।  
स्तन, मन, नैन, नितंब की बड़ौ इजाफा कीन ॥२॥

अर तैं टरत न बर-परे , दर्ई मरक मनु मैन ।  
होडा होडी बढि चले चितु, चतुराई, नैन ॥३॥

औरै - ओष कनीनिकनु गनी घनी - सिरताज ।  
मन धनी के नेह की बनीं छनीं पट लाज ॥४॥

सनि-कज्जल चख-झरख-लगन उपज्यौ सुदिन सनेहु ।  
क्यौं न नृपति है भोगवै लहि सुदेसु सबु देहु ॥५॥

सालति है नटसाल सी, क्यौं हूँ निकसति नाँहि ।  
मनमथ-नेजा-नोक सी खुभी खुभी जिय माँहि ॥६॥

जुवति जोन्ह मैं मिलि गई, नैक न होति लखाइ ।  
सौंधे कैं डोरै लगी अली चली सँग जाइ ॥७॥

हौं रीझी, लखि रीझिहौ छबिहिं छबीले लाल ।  
सोनजुही सी ह्वोति दुति-मिलत मालती माल ॥८॥

बहके, सब जिय की कहत, ठौरु कुठौरु लखैं न ।  
छिन औरै, छिन और से, ए छबि छके नैन ॥९॥

फिरि-फिरि चितु उत हीं रहतु , टूटी लाज की लाव ।  
अंग-अंग-छबि-झौर मैं भयौ भौर की नाव ॥१०॥

नीकी लागि अनाकनी, फीकी परी गोहारि ।  
तज्यौ मनौ तारन-बिरदु बारक बारनु तारि ॥११॥

चितई ललचौहैं चखनु डटि घूँघट-पट माँह ।  
छल सौं चली छुवाड़ कै छिनकु छबीली छँह ॥१२॥

जोग-जुगति सिखए सबै मनौ महामुनि मैन ।  
चाहत पिय-अद्वैतता काननु सेवत नैन ॥१३॥

खरी पातरी कान की, कौन बहाऊ बानि ।  
आक-कली न रली करै अली,अली जिय जानि ॥१४॥

पिय-बिछुरन कौ दुसहु दुखु, हरषु जात प्यौसार ।  
दुरजोधन लौं देखियति तजत प्रान इहि बार ॥१५॥

झीनैं पट मै झुलमुली झलकति ओप अपार ।  
सुरतरु की मनु सिंधु मै लसति सपल्लव डार ॥१६॥

डारे ठोड़ी - गाड़ , गहि नैन - बटोही, मारि ।  
चिलक-चौंध मै रूप-ठग, हाँसी-फाँसी डारि ॥१७॥

कीनैं हूँ कोरिक जतन अब कहि काढ़ै कौनु ।  
भो मन मोहन-रूपु मिलि पानी मै कौ लौनु ॥१८॥

लाग्यो सुमनु है है सफ्लु आतप-रोसु निवारि ।  
बारी, बारी आपनी सींचि सुहदता-बारि ॥१९॥

अजौ त्र्यौना ही रह्यौ श्रुति सेवत इक-रंग ।  
नाक-बास बेसरि लह्यौ बसि मुकुतनु कै संग ॥२०॥

जम-करि-मुँह-तरहरि पर्यौ, इहिं धरहरि चित लाउ ।  
बिषय-तृषा परिहरि अजौं नरहरि के गुन गाउ ॥२१॥

पलनु पीक , अंजनु अधर , धरे महावरु भाल ।  
आजु मिले सु भली करी, भले बने हौ लाल ॥२२॥

लाज - गरब - आलस - उमग - भरै नैन मुसकात ।  
रति-रमी रति देति कहि औरै प्रभा प्रभात ॥२३॥

पति रति की बतियाँ कहीं, सखी लखी मुसकाइ ।  
कै कै सबै टलाटली, अली चली सुखु पाइ ॥२४॥

तो पर वारौं उरबासी, सुनि राधिके सुजान ।  
तू मोहन कै उर बसी है उरबसी-समान ॥२५॥

कुच-गिरि चढ़ि, अति थकित है, चली डीठि मुँह-चाड़ ।  
फिरि न टरी, परियै रही, गिरी चिबुक की गाड़ ॥२६॥

बेधक अनियारे नयन, बेधत करि न निषेधु ।  
बरबबट बेधतु मो हियौ तो नासा कौ बेधु ॥२७॥

लौनै मुहुँ दीठि न लगै, यौ कहि दीनौ ईठि ।  
दूनी है लागन लगी, दियै दिठौना, दीठि ॥२८॥

चितवनि रूखे दृगनु की, हाँसी-बिनु मुसकानि ।  
मानु जनायौ मानिनी, जानि लियौ पिय, जानि ॥२९॥

सब ही त्यों समुहति छिनु, चलति सबनु दै पीठि ।  
वाही त्यों ठहरति यह, कविलनवी लौं, दीठि ॥३०॥

कौन भाँति रहिहै बिरदु अब देखिवी, मुरारि ।  
बीधे मोसौं आइ कै गीधे गीधहि तारि ॥३१॥

कहत, नटत, रीझत, खिझत, मिलत खिलत लजियात ।  
भरे भौन मै करत हैं, नैननु हीं सब बात ॥३२॥

वाही की चित चटपटी, धरत अटपटे पाइ ।  
लपट बुझावत बिरह की कपट-भरेऊ आइ ॥३३॥

लखि गुरुजन-विच कमल सौं सीसु छुवायौ स्याम ।  
हरि-सनमुख करि आरसी हियै लगाई बाम ॥३४॥

पाइ महावर दैन कौं नाइनि बैठी आइ ।  
फिरि-फिरि, जानि महावरी, एड़ी मीड़ति जाइ ॥३५॥

तोही, निरमोही, लग्यौ मो ही इहैं सुभाउ ।  
अनआएँ आवै नहीं, आएँ आवतु आउ ॥३६॥

नेहु न, नैननु, कौं कछू उपजी बड़ी बलाइ ।  
नीर-भरे नितप्रति रहैं, तऊ न प्यास बुझाइ ॥३७॥

नहिं पराग नहिं मधुर मधु नहिं विकास इहि काल ।  
अली, कली ही सौं बंध्यौ, आगै कौन हवाल ॥३८॥

लाल तुम्हारे विरह की अगनि अनूप, अपार ।  
सरसै बरसै नीर हूँ, झर हूँ मिटै न झार ॥३९॥

देह दुलहिया की बढै ज्यौं - ज्यौं जोबन - जोति ।  
त्यौं-त्यौं लखि सौत्यै सबै बदन मलिन दुति होति ॥४०॥

जगतु जनायौ जिहिं सकलु, सो हरि जान्यौ नाँहि ।  
ज्यौं आँखिनु सबु देखियै, आँखि न देखी जाँहि ॥४१॥

(सोरठा)

मंगल बिंदु सुरंगु, मुखु ससि, केसरि आइ गुरु ।  
इक नारी लहि संगु, रसमय किय लोचन-जगत ॥४२॥

(दोहा)

पिय तिय सौं हँसि कै कह्यौ, लखैं दिठौना दीन ।  
चंदमुखी, मुखचंदु तैं भलौ चंद-समु कीन ॥४३॥

कौंहर सी एड़ीनु की लाली देखि सुभाइ ।  
पाइ महावरु देइ को आपु भई बे पाइ ॥४४॥

खेलन सिखए, अलि, भलैं चतुर अहेरी मार ।  
कानन-चारी नैन-मृग नागर नरनु सिकार ॥४५॥

रससिंगार-मंजनु किए, कंजनु भंजनु दैन ।  
अंजनु रंजनु हूँ बिना खंजनु गंजनु, नैन ॥४६॥

साजे मोहन-मोह कौं, मोहीं करत कुचैन ।  
कहा करौं, उलटे परे टोने लोने नैन ॥४७॥

याकैं उर औरै कछू लगी बिरह की लाइ ।  
पजरै नीर गुलाब कैं, पिय की बात बुझाइ ॥४८॥

कहा लेहुगे खेल पै, तजौ अटपटी बात ।  
नैक हँसौही है भई भौहैं, सौहैं खात ॥४९॥

डारी सारी नील की ओट अचूक, चुकैन ।  
मो मन-मृगु करबर गहैं अहै! अहेरी नैन ॥५०॥

दीरघ साँस न लेहि दुख, सुख साईहि न भूलि ।  
दर्ई दर्ई क्यौं करतु है, दर्ई दर्ई सु कबूलि ॥५१॥

बैठि रही अति सघन बन, पैठि सदन-तन माँह ।  
देखि दुपहारी जेठ की छाँहौं चाहति छाँह ॥५२॥

हा हा! बदनु उघारि, दृग सफल करैं सबु कोइ ।  
रोज सरोजनु कैं परै, हँसी ससी की होइ ॥५३॥

होमति सुखु, करि कामना तुमहिं मिलन की, लाल ।  
ज्वालामुखी सी जरति लखि लगनि-अगनि की ज्वाल ॥५४॥

सायक-सम मायक नयन, रँगो त्रिबिध रँग गात ।  
झखौ बिलखि दुरि जात जल, लखि जलजात लजात ॥५५॥

मरी डरी कि टरी बिथा, कहा, खरी, चलि चाहि ।  
रही कराहि कराहि अति, अब मुँह आहि न आहि ॥५६॥

कहा भयौ, जौ बीछुरे, मो मनु तोमन-साथ ।  
उड़ी जाउ कित हूँ, तऊ गुड़ी उड़ाइक हाथ ॥५७॥

लखि लोने लोइननु कैं, कौड़नु, होई न आजु ।  
कौनु गरीबु निवाजिबौ, कित तूठ्यौं रतिराजु ॥५८॥

सीतलताऽरु सुबास कौ घटै न महिमा-मूरु ।  
पीनस वारै जौ तज्यौ सोरा जानि कपरु ॥५९॥

कागद पर लिखत न बनत, कहत सँदेसु लजात ।  
कहिहै सबु तेरौ हियौ मेरे हिय की बात ॥६०॥

बंधु भए का दीन के, को तार्यौ रधुराड़ ।  
तूठे तूठे फिरत हौ झूठे बिरद कहाड़ ॥६१॥

जब जब वै सुधि कीजियै, तब तब सब सुधि जाँहि ।  
आँखिनु आँखि लगी रहैं आँखें लागति नाँहि ॥६२॥

कौन सुनै, कासौ कहौ, सुरति बिसारी नाह ।  
बदाबदी ज्यौ लेत हैंए बदरा बदराह ॥६३॥

मैं हो जान्यौ, लोइननु जुस्त बाढ़िहै जोति ।  
को हो जानतु, दीठि कौं दीठि किरकिटी होति ॥६४॥

गहकि, गाँसु औरै गहैं, रहे अधकहे बैन ।  
देखि खिसौ हैं पिय-नयन किए रिसौ हैं नैन ॥६५॥

मैं तोसौं कैवा कह्यौ, तू जिन इन्हैं पत्याड़ ।  
लगालगी करि लोइननु उर मैं लाई लाड़ ॥६६॥

बर जीते सर मैन के, ऐसे देखे मैं न ।  
हरिनी के नैनानु तैं, हरि, नीके ए नैन ॥६७॥

थोरैं ही गुन रीझते, बिसराई वह बानि ।  
तुमहूँ, कान्ह, मनौ भए आजकाल्हि के दानि ॥६८॥

अंग-अंग-नग जगमगत दीपसिखा-सी देह ।  
दिया बढाएँ हूँ रहै, बड़ौ उज्यारौ गेह ॥६९॥

छुटी न सिसुता की झलक, झलक्यौ जोबनु अंग ।  
दीपत देह दुहून मिलि दिपति तापता-रंग ॥७०॥

कब कौ टेरतु दीन रट, होत न स्याम सहाइ ।  
तुमहूँ लागी जगत-गुरु, जग-नाइक जग-बाइ ॥७१॥

सकुचि न रहियै, स्याम, सुनि ए सतरौहैं बैन ।  
देत रचौँहौं चित कहे नेह-नैचौहैं नैन ॥७२॥

पत्रा हीं तिथि पाइयै, वा घर कै चहुँ पास ।  
नितप्रति पून्यौई रहै, आनन-ओप-उजास ॥७३॥

बसि सकोच-दसबदन-बस, साँचु दिखावति बाल ।  
सियलौं सोधति तिय तनहिं लगनि-अगनि की ज्वाल ॥७४॥

जौ न जुगति पिय मिलन की, धूरि मुकति मुँह दीन ।  
जौ लहियै संग सजन, तौ धरक नरक हूँ कीन ॥७५॥

चमक, तमक, हाँसी, ससक, मसक, झपट, लपटानि ।  
ए जिहिं रति, सो रति मुकति अति हानि ॥७६॥

मोहूँ सौं तजि माहु, दृग चले लागि उहिं गैल ।  
छिनकु छ्वाइ छबि-गुर-डरी छले छबीलैं छैल ॥७७॥

कंज-नयनि मंजनु किए, बैठी ब्यौरति बार ।  
कच-अँगुरी-बिच दीठि दै, चितवति नंदकुमार ॥७८॥

पावक सो नयननु लगै जावकु लाग्यौ भाल ।  
मुकुरु होहुगे नैक मै, मुकुरु बिलौकौ, लाल ॥७९॥

रहति न रन, जयसाहि-मुख लखि, लाखनु की फौज ।  
जाँचि निराखर ऊ चलै लै लाखनु की मौज ॥८०॥

दियौ, सु सीस चढाइ लै आछी भाँति अएरि ।  
जापै सुखु चाहतु लियौ, ताके दुखहिं न फेरि ॥८१॥

तरिवन-कनकु कपोल-दुति बिच बीच हीं बिकान ।  
लाल लाल चमकति चुनीं चौका चीन्ह-समान ॥८२॥

मोहि दयौ, मेरी भयौ, रहतु जु मिलि जिय साथ ।  
सो मनु बाँधि न सौँ पियै, पिय, सौतिनि कै हाथ ॥८३॥

कंजु-भवनु तजि भवन कौँ चलियै नंदकिसोर ।  
फूलति कली गुलाब की, चटकाहट चहुँ ओर ॥८४॥

कहति न देवर की कुबत कुल-तिय कलह डराति ।  
पंजर-गत मंजार-ढिग सुक जयौँ सूकति जाति ॥८५॥

औरै भाँति भए ऽब ए चौसरु, चंदनु, चंदु ।  
पति-बिनु अति पारतु बिपति मारुतु मंदु ॥८६॥

चलन ना पावतु निगम-मगु जगु, उपज्यौ अति त्रासु ।  
कुच-उतंग गिरिबर गह्वौ मैना मैनु मवासु ॥८७॥

त्रिबली, नाभि दिखाइ, कर सिर ढकि, सकुचि, समाहि ।  
गली, अली की ओट कै, चली भली बिधि चाहि ॥८८॥

देखत वुरै कपूर ज्यौँ उपै जाइ जिन, लाल ।  
छिन छिन जाति परी खरी छीन छबीली बाल ॥८९॥

हँसि उतारि हिय तैं दई तुम जु तिहिं दिना, लाल ।  
राखति प्रान कपूर ज्यौँ, वहै चुहुटिनी-माल ॥९०॥

कोऊ कोरिक संग्रहौ, कोऊ लाख हजार ।  
मो संपति जदुपति सदा बिपति-बिदारनहार ॥९१॥

द्वैज-सुधादीधिति-कला वह लखि, दीठि लगाइ ।  
मनौ अकास-अगस्तिया एकै कली लखाइ ॥९२॥

गदराने तन गोरटी, एंपन-आइ लिलार ।  
हूठ्यौ दै, इठलाइ, दृग करै गँवारि सुवार ॥९३॥

तंत्री-नाद, कबित्त-रस, सरस राग, रति-रंग ।  
अनबूडे बूडे, तरे जे बूडे सब अंग ॥९४॥



सहज सचिक्कन, स्याम-रुचि, सुचि, सुगंध, सुकुमार ।  
गनतु न मनु पथु अपथु, लखि बिथुरे सुथरे बार ॥१५॥

सुदुति दुगई दुरति नहिं, प्रगट करति रति-रूप ।  
छुटै पीक , औरै उठी लाली ओठ अनूप ॥१६॥

वेई गडि गाडै परीं, उपच्यौ हारु हियै न ।  
आच्यौ मोरि मतंगु मनु मारि गुरेरनु मैन ॥१७॥

नैक न झुरसी बिरह-झर नेह-लता कुम्हिलाति ।  
नित नित होति हरी हरी, खरी झालरति जाति ॥१८॥

हेरि हिंडोरै गगन तै परी परी सी टूटि ।  
धरी धाड़ पिय बीच हीं, करी खरी रस लूटि ॥१९॥

नैक हँसौहीं बानि तजि, लख्यौ परतु मुहूँ नीठि ।  
चौका-चनकनि-चौंध मै परति चौंधि सी डीठि ॥२०॥

प्रगट भए द्विजराज-कुल, सुबस बसे ब्रज आइ ।  
मेरे हरौ कलेस सब, केसव केसवराइ ॥२१॥

केसरि कै सरि क्यौँ सकै, चंपकु कितकु अनुपु ।  
गात-रूप लखि जातु दुरि जातरूप कौ रूपु ॥२२॥

मकराकृति गोपाल कै सोहत कुंडल कान ।  
धर्यौ मनौ हिय-धर समरु, ड्यौढी लसत निसान ॥२३॥

खौरि-पनिय भृकुटी-धनुषु बधिकु समरु, तजि कानि ।  
हनतु तरुन-मृग तिलक -सर सुरक - भाल, भरि तानि ॥२४॥

नीकौ लसतु लिलार पर टीकौ जरितु जराइ ।  
छबिहि बढावतु रबि मनौ ससि-मंडल मै आइ ॥२५॥

लसतु सेतसारी ढप्यौ, तरल तर्यौना कान ।  
पर्यौ मनौ सुरसरि-सलिल रबि-प्रतिबिंदु बिहान ॥२६॥

हम हारीं कै कै हहा, पाइनु पार्यौ प्यौर ।  
लेहु कहा अजहूँ किए तेह-तरैर्यौ त्यौर ॥१०७॥

सतर भौह, रूखे बचन, करति कठिनु मनु नीठि ।  
कहा करौं, हँ जाति हरि हेरि हँसौं हीं डीठि ॥१०८॥

वाहि लखैं लोइन लगै कौन जुवति की जोति ।  
जाकैं तन की छँह-ढिग जोन्ह छँह सी होति ॥१०९॥

कहा कहौं वाकी दसा, हरि प्राननु के ईस ।  
बिरह-ज्वाल जरिबो लखैं मरिबौ भई असीस ॥११०॥

जेति संपति कृपन कैं तेती सूमति जोर ।  
बढ़त जात ज्यों ज्यों उरज, त्यौं त्यौं होत कठोर ॥१११॥

ज्यों ज्यों जोबन-जेठ दिन कुच मिति अति अधिकाति ।  
त्यौं त्यौं छिन छिन कटि-छपा छीन परति नित जाति ॥११२॥

तेह-तरैरौ त्यौरु करि कत करियत दृग लोल ।  
लीक नहीं यह पीक की, श्रुति-मन झलक कपोल ॥११३॥

नैक न जानी परति, यौं पर्यौ बिरह तनु छामु ।  
उठति दियैं लौं नाँदि, हरि, लियैं तिहारौ नामु ॥११४॥

नभ-लाली चाली निसा, चटकाली धुनि कीन ।  
रति पाली, आली, अनत, आए बनमाली न ॥११५॥

सोवत सपनैं स्यामघनु मिलिहिलि हरत वियोगु ।  
तब हीं टरि कित हूँ गई, नींदौ नींदनु जोगु ॥११६॥

संपति केस सुदेस नर नवत, दुहुनि इक बानि ।  
बिभव सतर कुच, नीच नर, नरम बिभव की हानि ॥११७॥

कहत सबै कवि कमल से, मो मत नैन पखानु ।  
नतरुक कन इन बिय लगत उपजातु बिरह-कसानु ॥११८॥

हरि हरि ! बरि बरि उठति, करि करि थकी उपाड़ ।  
वाकौ जुरु, बलि बैद, जौ तो रस जाड़, तु जाड़ ॥११९॥

यह बिनुसुत नगु राखि कै जगत बड़ौ जसु लेहु ।  
जरी विषम जुर जाड़यै आड़ सुदरसनु देहु ॥१२०॥

या अनुरागी चित्त की, गति समुझै नहिं कोड़ ।  
ज्यौं-ज्यौं बूडै स्याम रँग, त्यों-त्यों उज्जलु होड़ ॥१२१॥

बिय सौतिनु देखत दई अपने हिय तै, लाल ।  
फिरति सबनु मैं उहडही उहैं मरगजी माल ॥१२२॥

छला छबीले लाल को, नवल नेह लहि नारि ।  
चूँबति, चाहति, लाड़ उर पहिरति, धरति उतारि ॥१२३॥

नित संसौ हंसौ बचतु, मनौ सु इहिं अनुमानु ।  
विरह-अगिनि-लपटनु सकलु झपटि न मीचु-सचानु ॥१२४॥

थाकी जतन अनेक करि, नैक न छाड़ति गैल ।  
करी खरी दुबरी सु लागि तेरी चाह-चुरैल ॥१२५॥

लाज गहौ, बेकाज कत घेरि रहे, घर जाँहि ।  
गोरसु चाहत फिरत हौ, गोरसु चाहत नाँहि ॥१२६॥

घाम घरीक निवारियै, कलित ललित अलि-पुंज ।  
जमुना-तीर तमाल-तरु-मिलित मालती-कुंज ॥१२७॥

उन हरकी हँसी कै, इतै इन सौपि मुसकाड़ ।  
नैन मिलै मन मिलि गए दोऊ, मिलवत गाड़ ॥१२८॥

पर्यौ जोरु, बिपरिति रति रुपी सुरत-रन-धीर ।  
करति कुलाहलु किंकिनी, गह्यौ मौनु मंजीर ॥१२९॥

बिनती रति बिपरीति की करी परसि पिय पाड़ ।  
हँसि, अनबोलै हीं दियौ ऊतरु, दियौ बताड़ ॥१३०॥

कैंसें छोटे नरनु तैं सरत बडनु के काम ।  
मढ्यौ दमामौ जातु क्यौँ, कहि चूहे कैं चाम ॥१३१॥

सकत न तुव ताते बचन मो रस कौ रसु खोड़ ।  
खिन खिन औटे खीर लौँ खरौ सवादिलु होड़ ॥१३२॥

कहि, लहि कौन सकै दुरी सौनजाड़ मै जाड़ ।  
तन की सहज सुबास बन देती जौ न बताड़ ॥१३३॥

चाले की बातैं चलीं, सुनत सखिनु कैं टोल ।  
गोएँ हूँ लोड़न हँसत, बिहसत जात कपोल ॥१३४॥

सनु सूक्यो, बीत्यौ बनौ, ऊखौ लई उखारि ।  
हरी हरी अरहरि अजैं, धरि धरिहरि जिय, नारि ॥१३५॥

आए आपु, भली करी, मेटन मान-मरोर ।  
दूरि करौ यह, देखिहै छला छिगुनिया-छोर ॥१३६॥

मेरे बूझत बात तू कत बहरावति, बाल ।  
जग जानी बिपरीत रति लखि बिंदुली पिय-भाल ॥१३७॥

फिरि फिरि बिलखी है लखति, फिरि फिरि लेति उसासु ।  
साई ! सिर-कच-सेत लौँ बीत्यौ चुनति कपासु ॥१३८॥

डगकु डगति सी चलि, ठठुकि चितई, चली निहारि ।  
लिए जाति चितु चोरटी वहै गोरटी नारि ॥१३९॥

करी बिरह ऐसी, तऊ गैल नै छाड़तु नीचु ।  
दीनैं हूँ चमसा चखनु चाहै लहै न मीचु ॥१४०॥

जपमाला, छापैं, तिलक सरै न एकौ कामु ।  
मन-काँचै नाचै वृथा, साँचै राँचै रामु ॥१४१॥

जौ वाके तन की दसा देख्यौ चाहत आपु ।  
तौ बलि, नैक बिलोकियै चलि अचकाँ, चुपचापु ॥१४२॥

जटिल नीलमनि जगमगति सींक सुहाई नाँक ।  
मनौ अली चंपक-कली बसि रसु लेतु निसाँक ॥१४३॥

फेरु कछुक करि पौरि तैं, फिरि, चितई मुसुकाइ ।  
आई जावनु लैन, जिय नेहैं चली जमाइ ॥१४४॥

जदपि तेजरौहाल-बल पलकौ लगी न बार ।  
तौ ग्वैऒौ घर का भयौ पैऒौ कोस हजार ॥१४५॥

पूस-मास सुनि सखिनु पै साई चलत सवारु ।  
गहि कर बीन प्रबीन तिय राग्यौ रागु मलारु ॥१४६॥

बन-तन कौं, निकसत, लसत हँसत हँसत, इत आइ ।  
दृग-खंजन गहि लै चल्याौ चितवनि-चैपु लगाइ ॥१४७॥

मरनु भलौ वरु बिरह तैं, यह निहचय करि जोइ ।  
मरन मिटै दुखु एक कौ, बिरह दुहूँ दुखु होइ ॥१४८॥

हरषि न बोली, लखि ललनु, निरखि अमिलु साँग साथु ।  
आँखिनु हीं में हँसि, धर्यो सीस हियैं धरि हाथु ॥१४९॥

को जानै, हैहै कहा, ब्रज उपजी अति आगि ।  
मन लागै नैननु लगैं, चलै न मग लागि लागि ॥१५०॥

घरु घरु डोलत दीन है, जनु जनु जाचतु जाइ ।  
दियैं लोभ चसमा चखनु लघु पुनि बडौ लखाइ ॥१५१॥

लै चुभकी चलि जाति जित जित जल-केलि-अधीर ।  
कीजत केसर-नीर से तित तित के सरि-नीर ॥१५२॥

छिरके नाह नबोढ़-दृग कर-पिजकी-जल-जोर ।  
रोचन-रँग-लाली भई बियतिय-लोचन-कोर ॥१५३॥

कहा लडैते दृग करे, परे लाल बेहाल ।  
कहुँ मुरली, कहुँ पीत पटु, कहुँ मुकुट बनमाल ॥१५४॥

राधा हरि, हरि राधिका बनि आए संकेत ।  
दंपति रति-बिपरीत-सुखु सहज सुरतहूँ लेत ॥१५५॥

चलत पाइ निगुनी गुनी धनु मनि-मुत्तिय-माल ।  
भेंट होत जयसाहि सौँ भागु चाहियतु भाल ॥१५६॥

जसु अपजसु देखत नहीं देखत साँवल-गात ।  
कहा करौँ, लालच-भरे चपल नैन चलि जात ॥१५७॥

नख-सिख-रूप भरे खरे, तौ माँगत मुसकानि ।  
तजत न लोचन लालची ए ललचौहीं बानि ॥१५८॥

छ्वै छिगुनी पहुँची गिलत अति दीनता दिखाइ ।  
बलि बावन कौ ब्यौतु सुनि को, बलि, तुन्हें पत्याइ ॥१५९॥

नैना नैक न मानहीं, कितौ कह्यौ समुझाय ।  
तनु मनु हारैं हूँ हँसैं, तिन सौँ कहा बसाइ ॥१६०॥

मोहन-मूरति स्याम की अति अद्भुत गति जोइ ।  
बसतु सु चित-अन्तर, तऊ प्रतिबिंबितु जग होइ ॥१६१॥

लटकि लटकि लटकतु चलतु, डटतु मुकुट की छँह ।  
चटक-भर्यौ नटु मिलि गयौ अटक भटक माँह ॥१६२॥

मलिन देह, वेई बसन, मलिन बिरह कै रूप ।  
पिय-आगम औरै चढी आनन ओप अनूप ॥१६३॥

रँगराती रातैं हियैं प्रियतम लिखी वनाइ ।  
पाती काती बिरह की छती रही लगाइ ॥१६४॥

लाल, अलौलिक लरिकई लखि लखि सखी सिहाँति ।  
आजगाल्हि मैं देखियतु उर उकसौँहीं भाँति ॥१६५॥

बिलखी डभकौँ हैं चखनु तिय लखि, गवनु बराइ ।  
पिय गहबरि आएँ गरैं राखी गरैं लगाइ ॥१६६॥

प्रतिबिंबित जयसाहि दुति दीपति दरपन-धाम ।  
सबु जगु जीतन कौ कर्यौ काय-ब्यूहु मनु काम ॥१६७॥

बाल, कहा लाली भई लोइन-कोइनु माँह ।  
लाल, तुम्हारे दृगनु की परी दृगनु मैं छाँह ॥१६८॥

तरुनकोकनद - बरनबर भए अरुन निसि जागि ।  
बाही कै अनुराग दृग रहे मनौ अनुरागि ॥१६९॥

तजतु अठान न, हठ पर्यौ सठमति, आठौ जाम ।  
भयौ बामु वा बाम कौ रहै कामु बेकाम ॥१७०॥

आवत जात न जानियतु, तेजहिं तजि सियरानु ।  
घरहैं जँवाई लौं घट्यौ खरौ पूस-दिन-मानु ॥१७१॥

चलत चलत लौं लै चलै सब मुख संग लगाइ ।  
ग्रीषम बासर सिसिर निसि प्यौ मो पास बसाइ ॥१७२॥

बेसरि - मोती-दुति - झलक परी ओठ पर आइ ।  
चूनौ होइ न चतुर तिय, क्योँ पट पोछ्योँ जाइ ॥१७३॥

चितु बितु बचतु न, हरत हठि लालन दृग बरजोर ।  
सावधान के बटपरा ए, जागत के चोर ॥१७४॥

बिकसित - नवमल्लो कुसुम निकसित परिमल पाइ ।  
परसि पजारति बिरहि हिय बरसि रहे की बाइ ॥१७५॥

गोप अथाइनु तैं उठे, गोरज छाई गैल ।  
चलि, बलि, अलि अभिसार की भली सँझौखैं सैल ॥१७६॥

पहुँचति डटि रन -सुभट लौं, रोकि सकैं सब नाँहि ।  
लाखनु हूँ की भीर मैं आँखि उहीं चलि जाँहि ॥१७७॥

सरस सुमिल चित तुरंग की करि करि अमित उठान ।  
गोइ निबाहैं जीतियै खेलि प्रेम - चौगान ॥१७८॥

हँसि हँसि हेरति नवल तिय मद उमदाति ।  
बलकि बलकि बोलति बचन, ललकि ललकि लपटाति ॥१७९॥

मिलि चंदन बेंदी रही गौरैं मुँह, न लखाइ ।  
ज्यौं ज्यौं मद - लाली चढ़ै, त्यों त्यों उघरति जाइ ॥१८०॥

(सोरठा)

मैं समुझ्यो निराधार, यह जग काचो काँच सौ ।  
एकै रूपु अपार, प्रतिबिंबित लखियतु जहाँ ॥१८१॥

जहाँ जहाँ ठाढ़ौ लख्यौ स्यामु सुभग सिरमौरु ।  
बिन हूँ उन छिनु गहि रहतु दृगनु अजौं वह ठौरु ॥१८२॥

रंगी सुरत रंग, पिय हियैं लगी जगी सब राति ।  
पैँड पैँड पर ठठुकि कै, ऐँड भरी ऐँडाति ॥१८३॥

लालन लहि पाएँ दुरै चोरी सौह करैं न ।  
सीस चढ़े पनिहा प्रगट कहैं पुकारैं नैन ॥१८४॥

तुरत तुरत कैसैं दुरत, मुरन नैन जुरि नीठि ।  
डौंड़ी दै गुन रावरे कहति कनौड़ी डीठि ॥१८५॥

मरकत - भाजन - सलिल गत इन्दुकला कै बेख ।  
झींन झगा मैं झलमलै स्यामगात नखरेख ॥१८६॥

बालमु बारैं सौति कै सुनि परनारि बिहार ।  
भो रसु अनरसु, रिस रली, रीझ खीझ इक बार ॥१८७॥

दुरत न कुच बिच कंचुकी चुपरी, सारी सेत ।  
कवि-आँकनु के अरथ लौं प्रगटि दिखाई देत ॥१८८॥

भई जु छबि तन बसन मिलि, बरनि सकैं सु न बैन ।  
आँग-ओप आँगी दुरी, आँगी आँग दुरै न ॥१८९॥

सोनजुही सी जगमगति, अँग अँग जोबनु-जोति ।  
सुरँग कुसूँभी कंचुकी, दुरँग देह दुति होति ॥१९०॥



बड़े न दूजे गुननु बिनु बिरद-बड़ाई पाइ ।  
कहत धतूरे सौं कनकु , गहनौ गढ्यौ न जाइ ॥१९१॥

कनकु कनक तैं सौगुनौ मादकता अधिकाइ ।  
उहिं खाएं बौराइ इहिं पाएं हीं बौराइ ॥१९२॥

डीठिबरत बाँधी अटनु , चढि धावत न डारात ।  
इतहिं उतहिं वित दुहुनु के नट लौं आवत जात ॥१९३॥

झटकि चढति उतरति अटा , नैक न थाकति देह ।  
भई रहति नट कौ बटा अटकी नागर-नेह ॥१९४॥

लोभ-लगे हरि रूप के , करी साँटि जुरि, जाइ ।  
हौं इन बेची बीच हीं, लोइन बड़ी बलाइ ॥१९५॥

चिलक , चिकनाई, चटक सौं लफति सटकलौं आइ ।  
नारि सलोनी साँवरी नागिनी लौं डसि जाइ ॥१९६॥

तोरस-राँच्यौ आन-बस कहौ कुटिल-मति, कूर ।  
जीभ निबौरी क्यौं लगै, बौरी चाखि अँगूर ॥१९७॥

जुरे दुहुनु के दृग झमकि, रुकेन झीनैं चीर ।  
हलुकी फौज हरौल ज्यौं परै गोल पर भीर ॥१९८॥

केसर केसरि-कुंसुम के रहे अंग लपटाइ ।  
लगे जानि नख अनखुली कत बोलति अनखाइ ॥१९९॥

दृग मिहचत मृग-लोचनी भर्यौ, उलटि भुज, बाथ ।  
जानि गई तिय नाथ के हाथ परस हीं हाथ ॥२००॥

तजि तीरथ, हरि-राधिका-तन-दुति करि अनुरागु ।  
जिहिं ब्रज-केलि-निकुंज-मग पग पग होत प्रयागु ॥२०१॥

खिन खिन में खटकति सु हिय, खरी भीर मै जात ।  
कहि जु चली, अनहीं चितै, ओठनु हीं बिच बात ॥२०२॥

अजौ न आए सहज रँग बिरह-दूबरै गात ।  
अब ही कहा चलाइयति, ललन चलन की बात ॥२०३॥

अपनै कर गुहि, आपु हठि हिय पहिराई लाल ।  
नौल सिरी औरै चढी बौलसिरी की माल ॥२०४॥

नई लगनि, कुल की सकुच बिकल भई अकुलाइ ।  
दुहँ ओर ऐंची फिरत, फिरकी लौं दिनु जाइ ॥२०५॥

इत तैं उत, उत तैं इतै, छिनु न कहूँ ठहराति ।  
जक न परति, चकरी भई, फिरि आवति फिरि जाति ॥२०६॥

निसि अँधियारी, नील पटु पहिरि, चली पिय-गेह ।  
कहौ, दुराई क्यों दुरै दीप सिखा सी देह ॥२०७॥

रह्यौ ढीठु ढाढसु गहैं, ससहरि गयौ न सूरु ।  
मुर्यौ न मन सुरवानु चभि, भौ चूरनु चपि चूरु ॥२०८॥

सोहत अँगुठा पाइ कै अनवटु जर्यौ जराइ ।  
जीत्यौ तरिवन-दुति, सु ढरि पर्यौ तरनि मनु पाइ ॥२०९॥

जंघ जुगल लोइन निरे करे मनौ बिधि मैन ।  
केलि-तरनु दुखदैन ए , केलि-तरन सुखदैन ॥२१०॥

रही पकरि पाटी सु रिस भरे भौंह, चितु, नैन ।  
लखि सपनै तियआन-रत, जगतहु लगत हियैन ॥२११॥

किय हाइलु चित-चाइ लागि, बजि पाइल तुव पाइ ।  
पुनि सुनि सुनि मुँह-मधुरधुनि क्यों न लालु ललचाइ ॥२१२॥

लीनै हूँ साइसु, कीनै जतन हजारु ।  
लोइन लोइन-सिंधु तन पैरि ना पावत पारु ॥२१३॥

पट की ढिग कत ढाँपियति, सोभित सुभग सुबेष ।  
हद रदछद छबि देति यह सद रद छद की रेख ॥२१४॥

नाह गरज नाहर गरज, बोलु सुनायौ टेरि ।  
फँसी फौज मैं बंदि-बिच, हँसी सबनु तनु हेरि ॥२१५॥

बाल-बेलि सूखी सुखद इहिं रूखीरूख-घाम ।  
फेरि डहडही कीजयै सुरस सींचि, घनश्याम ॥२१६॥

औंधाई सीसी, सु लखि बिरह-बरनि बिललात ।  
बिच हीं सूखि गुलाबु गौ, छीटौ छुई न गात ॥२१७॥

तजी संक, सकुचति न चित बोलत बाकु कुबाकु ।  
दिनछिनदा छाकी रहति, छुटतु न छिनु छबि-छाकु ॥२१८॥

फिर फिरि बूझति, कहि कहा कह्यौ साँवरे गात ।  
कहा करत देखे, कहाँ, अली, चली क्यौँ बात ॥२१९॥

नव नागरितन-मुलुकु लहि जोबन-आमिर-जौर ।  
घटि बढि तैं बढि घटि रकम करीं और की और ॥२२०॥

कीजै चित सोई, तरे जिहिं पतितनु के साथ ।  
मेरे गुन-औगुन-गननु गनौ न, गोपीनाथ ॥२२१॥

मृगनैनी दृग की फरक, उर-उछाह, तन फूल ।  
बिन हीं पिय-आगम उमगि पलटन लगी दुकूल ॥२२२॥

रहे बरोठे मैं मिलत पिउ प्राननु के ईसु ।  
आवत की भई बिधि की घरी घरी सु ॥२२३॥

रबि बंदौ कर जोरि, ए सुनत स्याम के बैन ।  
भए हँसौं हैं सबनु के अति अनखौहैं नैन ॥२२४॥

हौं हीं बौरी बिरह-बस, कै बौरौ सबु गाउँ ।  
कहा जानि ए कहत हैं ससिहिं सीतकर-नाउँ ॥२२५॥

अनी बड़ी उमड़ी लखैं असिबाहक, भट भूप ।  
मंगलु करि मान्यौ हियैं, भो मुँहु मंगलु रूप ॥२२६॥

सोवत, जागत, सुपन-बस, रस, रिस, चैन, कुचैन ।  
सुरति स्यामघन की, सु रति बिसरै हूँ बिसरै न ॥२२७॥

संगति सुमति न पावहीं परे कुमति कै धंध ।  
राखौ मेलि कपूर मै, हींग न होइ सुगंध ॥२२८॥

बड़े कहावत आप सौं, गरुवे गोपीनाथ ।  
तौ बदिहौं, जौ राखिहौ हाथनु लखि मनु हाथ ॥२२९॥

(सोरठा)

कौड़ा आँसू-बूँद कस साँकर बरुनी सजल ।  
कीने बदन निमूँद, दृग-मालिन डारे रहत ॥२३०॥

उयौ सरद-राका-ससी, करति क्यों न चिंत चेतु ।  
मनौ मदन छितिपाल कौ छँहगीरु छबि देतु ॥२३१॥

ढरे ढार, तेहीं ढरत, दूजै ढार ढरै न ।  
क्यों हूँ आनन आन सौं नैना लागत नै न ॥२३२॥

सोवत लखि मन मानु धरि, ढिग सोयौ प्यौ आइ ।  
रही, सुपन की मिलनि मिलि, तिय हिय सौं लपटाइ ॥२३३॥

जोन्ह नहीं यह, तमु पहै, किए जु जगत निकेतु ।  
होत उदै ससि के भयौ मानहु ससहरि सेतु ॥२३४॥

जात जात बितु होतु है ज्यौं जिय मै संतोषु ।  
होत होत जौ होइ तौ होइ घरी मै मोषु ॥२३५॥

तन भूषन, अंजन दृगनु, पगनु, महावर-रंग ।  
नहिं सोभा कौं साजियतु कहिबैं हीं कौं अंग ॥२३६॥

पाइ तरुनिकुच-उच्चपटु चिरम ठग्यौ सबु गाउँ ।  
छुटै ठौरु रहिहै वहै, जु हो मालु, छबि, नाउँ ॥२३७॥

नितप्रति एकत हीं रहत, बैस-बरन-मन-एक ।  
चहियत जुगलकिसोर लखि लोचन-जुगल अनेक ॥२३८॥

मन धरति मेरौ कह्यौ तूँ आपनैँ सयान ।  
अहे, परनि परि प्रेम की परहथ पारि न प्रान ॥२३९॥

नख-रेख सोहैं नई, अलसौँ हैं सब गात ।  
सौँ हैं होत न नैन ए , तुम सौँहैं कत खात ॥२४०॥

हरि , कीजति बिनती यहै तुम सौँ बार हजार ।  
जिहिं तिहिं भाँति डर्यौ रह्यौ पर्यौ रहौँ दरबार ॥२४१॥

भौंह उँचै, आँचरु उलटि, मोरि मोरि , मुहु मोरि ।  
नीठि नीठि भीतर गई , दीठि दीठि सौँ जोरि ॥२४२॥

रस की सीरुख, ससिमुशी, हँसि हँसि बोलत बैन ।  
गूढ मानु मन क्यौँ रहै, भए बूढ-रँग नैन ॥२४३॥

जिहिं निदाघ-दुपहर रहै भई माघ की राति ।  
तिहिं उसीर की रावटी खरी आवटी जाति ॥२४४॥

रही दहेंडी ढिग धरी, भरी मथनिया बारि ।  
फेरति करि उलटी रई नई बिलोवनहारि ॥२४५॥

देबर - फूल - हने जु , सु उठ हरषि अँग फूलि ।  
हँसी करति औषधि सखिनु देह - ददोरनु भूलि ॥२४६॥

फूले फदकत लै फरी पल, कटाक्ष - करवार ।  
करत बचावत बिय-नयन-पाइक धाई हजार ॥२४७॥

पहुला - हारु हियैँ लसै, सन की बेंदी भाल ।  
राखति खेत खरे खरे खरे - उरोजनु बाल ॥२४८॥

लई सौंह सी सुनन की तजि मुरली, धुनि आन ।  
किए रहति नित रातिदिनु कानन - लागे कान ॥२४९॥

तूँ मति मानै मुकतई कियैँ कपट चित कोटि ।  
जौ गुनही, तौ राखियैँ आँखिनु माँझ अगोटि ॥२५०॥

गिरि तें ऊँचे रसिक - मन बुढे जहाँ हजारु ।  
वहै सदा पसु - नरनु कौ प्रेम - पयोधि पगारु ॥२५१॥

भावकु उभरौँहौँ भयौ, कछुकु पर्यौ भरुआई ।  
सीप - हरा कै मिसि हियौ निसि दिन हेरत जाई ॥२५२॥

गली अँधेरी, साँकरी भौ भटभेरा आनि ।  
पर पिछाने परसपर दोऊ परस - पिछानि ॥२५३॥

कहि, पठई जिय - भावति पिय आवन की बात ।  
फूली आँगन में फिरै, आँग न आँग समात ॥२५४॥

जिन दिन देखे वे कुसुम, गई सु बीति बहार ।  
अब, अलि, रही गुलाब मैं अपत, कँटीली डार ॥२५५॥

मैं बरजी कै बार कै बार तूँ, इत कित लेति करौट ।  
पँखुरी लगैं गुलाब की परिहै गात खरौट ॥२५६॥

नीचयै नीची निपट दीठि कुही लौँ दौरि ।  
उठि ऊँचै, नीचौँ दयौ मनु कुलिंगु झपि, झौरि ॥२५७॥

सूर उदित हूँ मुदित-मन, मुखु सुखमा की ओर ।  
चितै रहत चहुँ ओर तैं, निहचल चखनु, चकोर ॥२५८॥

स्वेद - सलिलु, सोमांस - कुसु गहि दुलही अरु नाथ ।  
दियौ हियौ संग हाथ कै हथलेय हीं हाथ ॥२५९॥

दच्छिन पिय, है बाम-बस, बिसराँई तिय आन ।  
एकै बापरि कै बिरह लागी बरष बिहान ॥२६०॥

(सोरठा)

मोहूँ दीजै मोषु, ज्यौँ अनेक अधमनु दियौ ।  
जौ बाँधै ही तोषु, तौ बाँधौ अपनै गुननु ॥२६१॥

चितु तरसतु, मिलत न बनतु बसि परोस कै बास ।  
छती फाटी जाजि सुनि टाटी - ओट उसास ॥२६२॥

जालरंध्र - मग अँगनु कौ कछु उजास सौ पाइ ।  
पीठि दिये जगत्यौ रहौ, डीठि झँरोखैं लाइ ॥२६३॥

परतिय - दोषु पुरान सुनि लखि मुलकी सुखदानि ।  
कसु करि राखी मिश्र हूँ मुँह-आई मुसकानि ॥२६४॥

सहित सनेह, सकोच सुख, स्वेद, कंप, मुसकानि ।  
प्राण पानि करि आपनै, पान धरे मो पानि ॥२६५॥

सीरैं जतननु सिसिर - रितु सहि बिरहिन-तन तापु ।  
बसिबे कौं ग्रीषम-दिननु पर्यौ परोसिनि पापु ॥२६६॥

सोहतु संगु समान सौं, यहै कहै सबु लोगु ।  
पान - पीक ओठनु बनै, काजर नैननु जोगु ॥२६७॥

तूँ रहि, हौं हीं, सखि, लखौ; चढि न अटा, बलि, बाल ।  
सबहिनु बिनु हीं ससि-उदै दीजतु अरघु अकाल ॥२६८॥

दियौ अरघु, नीचैं चलौ, संकटु भानैं जाइ ।  
सुचिति है औरौ सबै ससिहिं बिलोकैं आइ ॥२६९॥

ललित स्याम लीला, ललन, बढी चिबुक छबि दून ।  
मधु - छक्यौ मधुकरु पर्यौ मनौ गुलाब - प्रसून ॥२७०॥

सबै सुहाएई लगैं बसैं सुहाएँ ठाम ।  
गौरैं मुँह बेंदी लसैं अरुन, पीत, सित, स्याम ॥२७१॥

भाए बटाऊ नेहु तजि, बादि बकति बेकाज ।  
अब, अलि, देत उराहनौ अति उपजति उर लाज ॥२७२॥

मानु कत बरजति न हौं, उलटि दिवावति सौंह ।  
करी रिसौंहीं जाहिगी सहज हँसौंहीं भौंह ॥२७३॥

तिय - तिथि तरुन - किसोर - बय पुन्यकाल-सम दोनु ।  
काहूँ पुन्यनु पाइयतु बैस - संधि - संक्रोनु ॥२७४॥

गनती गनिबे तैं रहे, छत हूँ अछत समान ।  
अलि, अब ए तिथि औम लौं परे रहौ तन प्रान ॥२७५॥

सबै हँसत करतार दै नागरता कैं नाँव ।  
गयौ गरबु गुन कौ सरबु गएँ गँवारैं गाँव ॥२७६॥

जाति मरी बिछुरी घरी जल - सफरी की रीति ।  
खिन खिन होति खरी खरी, अरी, जरी यह प्रीति ॥२७७॥

पिय - प्राननु की पाहरू, करति जतन अति आपु ।  
जाकी दुसह दसा पर्यौ सौतिनिहूँ संतापु ॥२७८॥

अहे, कहै न कहा कह्यो तोसौं नंदकिसोर ।  
बड़बोली, बलि, होति कत बड़े दृगनु कैं जोर ॥२७९॥

दियौ जु पिय लखि चखनु मैं खेलत फाग-खियालु ।  
बाढत हूँ अति पीर सु न काढत बनतु गुलालु ॥२८०॥

मैं तापड़ त्रयताप सौं राख्यौ हियौ हमामु ।  
मति कबहुँक आएँ यहाँ पुलकि पसीजै स्यामु ॥२८१॥

बहकि बडाई आपनी कत राँचत मति-भूल ।  
बिनु मधु मधुकर कैं हियैं गडै न, गुडहर, फूल ॥२८२॥

आडे दै आले बसन जाडे हूँ की राति ।  
साहसु ककै सनेह - बस सखी सबै ढिग जाति ॥२८३॥

सब अँग करि राखी सुघर नाइक नेह-सिखाइ ।  
रसजुत लेति अनंत गति पुतरी पातुर - राइ ॥२८४॥

सुनत पथिक - मुँह, माह-निसि लुवैं चलैं उहिं गाम ।  
बिनु बूझैं, बिनु हीं कहैं, जियति बिचारी बाम ॥२८५॥

अनत बसे निसि की रिसनु उर बरि रही बिसेषि ।  
तऊ लाज आई झुकत खरे लजीहैं देखि ॥२८६॥



सुरँगु महावरु सौति - पग निरखि रही अनखाइ ।  
पिय-अँगुरिनु लाली लखैं खरी उठी लागि लाइ ॥२८७॥

मानहु मुँह ट्ट दिखरावनी दुलहिहिं करि अनुरागु ।  
सासु सदनु , मनु ललन हूँ , सौतिनु दियौ सुहागु ॥२८८॥

कत सकुचत, निधरक फिरौ, रतियौ खोरि तुम्हैं न ।  
कहा करौ, जौ जाइ ए लगैं लगौहैं नैन ॥२८९॥

आपु दियौ मनु फेरि लै, पलटैं दीनी पीठी ।  
कौन चाल यह रावरी, लाला, लुकावत डीठी ॥२९०॥

गोपिनु सँग निसि सरद की रमत रसिकरस-रास ।  
लहाछेह अति गतिनु की सबनु लखे सब-पास ॥२९१॥

स्याम-सुरति करि राधिका, तकति तरनिजा-तीरु ।  
अँसुवनु करति तरौंस कौ खिनकु खरौहों नीरु ॥२९२॥

गोपिनु कै अँसुवनु भरी सदा असोस, अपार ।  
डगर डगर नै है रही, बगर बगर कै बार ॥२९३॥

दुचितैं चित हलति न चलति, हँसति न झुकति, बिचारि ।  
लखत चित्र पिउ लखि, चितै रही चित्र लौं नारि ॥२९४॥

कन दैबौ सौप्यौ ससुर, बहू थुरहथी जानि ।  
रूप-रहचटैं लागि लग्यौ माँगन सबु जगु आनि ॥२९५॥

निरखि नवोद्धा नारि-तन छुटत लरिकई-लेस ।  
भौ प्यारौ प्रीतमु नियनु , मनहु चलत परदेस ॥२९६॥

प्रानप्रिया हिय मै बसै, नखरेखा-ससि भाल ।  
भलौ दिखायौ आइ यह हरि-हर-रूप, रसाल ॥२९७॥

तिय निय हिय जु लगी चलत पिय-नख-रेख-खरौंट ।  
सूखन देति न सरसई खोंटि खोंटि खत-खौंट ॥२९८॥

सघन कुंज, घन घन-तिमिरु, अधिक अँधेरी राति ।  
तऊ न दुरिहै, स्याम, वह दीपसिखा सी जाति ॥२९९॥

स्वारथु, सुकृतु न, श्रमु बृथा; देखि, बिहंग, बिचारि ।  
बाक, पराएँ पानि परि तूँ पच्छीनु न मारि ॥३००॥

सीस-मुकुट, कटि-काछनी, कर-मुरली, उर-माल ।  
इहिँ बानक मो मन सदा बसौ, बिहारी लाल ॥३०१॥

भृकुटी-मटकनि, पीतपट-चटक, लटकती चाल ।  
चलचख-चितवनि चोरि चितु लियौ बिहारी लाल ॥३०२॥

संगति-दोषु लगै सबनु, कहे ति साँचे बैन ।  
कुटिल-बंक-भ्रुव-सँग भए कुटिल, बंक-गति नैन ॥३०३॥

जरी-कोर गोरै बदन बढी खरी छबि, देखु ।  
लसित मनौ बिजुरी किए सारद-ससि-परिबेषु ॥३०४॥

चितवनि भोरे भाइ की, गोरै मुँह मुसकानि ।  
लागति लटकि अली-गरै, चित खटकति नित आनि ॥३०५॥

इहिँ द्वैहीं मौती सुगथ तूँ, नथ गरिब निसाँक ।  
जिहिँ पहिरै जग-दृग ग्रसति लसति हँसति सी नाँक ॥३०६॥

हरि-छबि-जल जब तैं परे, तब तैं छिनु बिछुरै न ।  
भरत ढरत, बूडत तरत रहत घरी लौँ नैन ॥३०७॥

मार-सुमार-करी डरी मरी, मरीहिँ न मारि ।  
सींचि गुलाब घरी घरी, अरी, बरीहिँ न बारि ॥३०८॥

क्यौँ हूँ सहबात न लगै, थाके भेद-उपाइ ।  
हठ-दृढगढ-गढवै सु चलि लीजै सुरँग लगाइ ॥३०९॥

तो ही का छुटि मानु गौ देखत हीँ ब्रजराज ।  
रही घरिक लौँ मान सी मान करे की लाज ॥३१०॥

न ए बिससियहि लखि नए दुरजन दुसह-सुभाइ ।  
आँटै परि प्राननु हरत काँटै लौं लागि पाइ ॥३११॥

सखि, सोहति गोपाल कै उर गुंजनु की माल ।  
बाहिर लसति मनौ पिए दावानल की ज्वाल ॥३१२॥

गहिली, गरबु न कीजियै समै-सुहागहिं पाइ ।  
जिय की जीवनि जेठ, सो माह न छाँह सुहाइ ॥३१३॥

हँसि, हँसाइ, उर लाइ उठि, कहि न रुखौं हैं बैन ।  
जकित थकित है तकि रहे तकत तिलौंछै नैन ॥३१४॥

तीज-परब सौतिनु सजे भूषन बसन सरीर ।  
सबै मरगजे-मुँह करीं इही मरगजै चीर ॥३१५॥

गढ-रचना, बरुनी, अलक, चितवनि, भौंह, कमान ।  
आघु बँकाईहीं चढै, तरुनि, तुरंगम, तान ॥३१६॥

इत आवति चलि, जाति उत चली, छसातक हाथ ।  
चढी हिंडोरै सै रहै लगी उसासनु साथ ॥३१७॥

डर न टरै, नींद न परै, हरै न काल-बिपाकु ।  
छिनकु छाकि उछकै न फिरि, खरौ विषमु छबि-छाकु ॥३१८॥

रमन कह्यौ हठि रमन कौं रतिबिपरीत-बिलास ।  
चितई करि लोचन सतर, सलज, सरोस, सहास ॥३१९॥

ऐंचति सी चितवनि चितै भई ओठ अलसाइ ।  
फिरि उझकनि कौं मृगनयनि दृगनि लगनिया लाइ ॥३२०॥

नर की अरु नल-नीर की गति एकै करि जोइ ।  
जेतौ नीची है चलै, तेतौ ऊँचौ होइ ॥३२१॥

भूषन-भारु सँभारिहै क्यों इहिं तन सुकुमार ।  
सूधे पाइ न धर परै सोभा हीं कै भार ॥३२२॥

मुँह मिठासु, दृग चीकने, भौँहैं सरल सुभाइ ।  
तऊ खरैं आदर खरौ खिन खिन हियौ सकाइ ॥३२३॥

जदपि नाहिं नाहीं नहीं बदन लगी जकजाति ।  
तदपि भौँह-हाँसी भरिनु हाँसीयै ठहराति ॥३२४॥

छुटन न पैयतु छिनकु बसि, नेह-नगर यह चाल ।  
मार्यौ फिरि फिरि मारियै, खूनी फिरै खुस्याल ॥३२५॥

चुनरी स्याम सतार नभ, मुँह ससि की उनहारि ।  
नेहु दबावतु नींद लौं निरखि निसा सी नारि ॥३२६॥

कहत सबै, बेंदी दियैं आँकु हसगुनो होतु ।  
तिय-लिलार बेंदी दियैं अगिनितु बढतु उदोतु ॥३२७॥

तर झरसी, ऊपर गरी, कज्जल-जल छिरकाइ ।  
पिय पाती बिन हीं लिखी, बाँची बिरह-बलाइ ॥३२८॥

(सोरठा)

बिरह सुकाई देह, नेहु कियौ अति डहडहौ ।  
जैसैं बरसैं मेह, जरै जवासौ, जौ जमै ॥३२९॥

(दोहा)

देखी सो न, जु ही फिरति सोनजुही सैं अंग ।  
दुति-लपटनु पट सेत हूँ करति बनौटी रंग ॥३३०॥

बढत बढत संपति-सलिलु मन-सरोज बढि जाइ ।  
घटत घटत सु न फिरि घटै, बरु समूल कुम्हिलाइ ॥३३१॥

हाँ न चलै, बलि, रावरी चतुराई की चाल ।  
सनख हियैं खिन-खिन नटत अनख बढावत, लाल ॥३३२॥

डीठि न परतु समान-दुति कनकु कनकसैं गात ।  
भूषन कर करकस लगत परसि पिछने जात ॥३३३॥

करतु मलिन आछी छबिहि, हरतु जु सहजु बिकासु ।  
अंगरागु अंगनु लगै, ज्यौ आरसी उसासु ॥३३४॥

पहिरि न भूषन कनक के, कहि आवत इहि हेत ।  
दरपन के से मोरचे, देह दिखाई देत ॥३३५॥

जदपि चावाइनु चीकनी चलति चहूँ दिसि सैन ।  
तऊ न छाडत दुहुनु के हँसी रसीले नैन ॥३३६॥

अनरस हूँ रसू पाइयतु, रसिक रसीली-पास ।  
जैसैं साँठे की कठिन गाँठ्यौ भरी मिठास ॥३३७॥

गोरी छिगुनी, नखु अरुनु, छला स्यामु छबि देइ ।  
लहत मुकुति रति पलकु यह नैन त्रिबेनी सेइ ॥३३८॥

उर मानिक की उरबसी डटल घटतु दूग-दागु ।  
छलकतु बाहिर भरि मनौ तिय-हियकौ-अनुरागु ॥३३९॥

सहज सेत पँचतोरिया पहिरत अति छबि होति ।  
जलचादर के दीप लौं जगमगाति तन-जोति ॥३४०॥

कोरि जतन कोऊ करौ, परै प्रकृतिहिं बीचु ।  
नल-बल जलु ऊँचैं चढ़ै, अंत नीच कौ नीचु ॥३४१॥

लगत सुभग सीतल किरन, निसि-सुख दिन अवगाहि ।  
माह ससी-भ्रम सूर-त्यौ रहति चकोरी चाहि ॥३४२॥

तपन-तेज तपु-ताप तपि, अतुल तुलाई माँह ।  
सिसिर-सीतु क्यौँ हूँ न कटै बिनु लपटैं तिय नाँह ॥३४३॥

रह न सकी सब जगत में सिसिर-सीत कैं त्रास ।  
गरम भाजि गढ़वै भई तिय-कुच अचल मवास ॥३४४॥

झूठे जानि न संग्रहे मन मुँह-निकसे बैन ।  
याही तैं मानहु किये बातनु कौँ बिधि नैन ॥३४५॥

सुघर-सौति-बस पिउ सुनत दुलहिनि दुगुन हुलास ।  
लखी सखी तन दीठि करि सगरब, सलज, सहास ॥३४६॥

लिखन बैठि जाकी सबी गहि गहि गरब गरूर ।  
भए न केते जगत के चतुर चितेरे कूर ॥३४७॥

टुनहाई सब टोल मै रही जु सौति कहाइ ।  
सुतैं ऐं चि प्यौं आपु-त्यौं करी अदोखिल आइ ॥३४८॥

दूगनु लगत, बेधत हियहिं, बिकल करत अंग आन ।  
ए तेरे सब तैं विषम ईछन-तीछन बान ॥३४९॥

पीठि दिये हीं, नैक मुरि, कर घूँघट-पटु टारि ।  
भरि, गुलाब की मूठि सौं, गई मूठि सी मारि ॥३५०॥

गुनी गुनी सबकैं कहैं निगुनी गुनी न होतु ।  
सुन्यौ कहूँ तरु अरक तैं अरक समानु उदोतु ॥३५१॥

छुटत मुठिनु सँग हीं छुटी लोक-लाज, कुल-चाल ।  
लगे दुहुनु इक बेर ही चल चित, नैन गुलाल ॥३५२॥

ज्यौं ज्यौं पटु झटकति, हठति, हँसति, नचावति नैन ।  
त्यौं त्यौं निपट उदारहूँ फगुवा देत बनै न ॥३५३॥

ज्यौं ज्यौं पावक-लपट सी तिय हिय सौं लपटाति ।  
त्यौं त्यौं छुही गुलाब सैं छतिया अति सियराति ॥३५४॥

भाल-लालबेदी-छए छुटे बार छबि देत ।  
गह्यौ राहु, अति आहु करि, मनु ससि सूर-समेत ॥३५५॥

तिय, कित कमनैती पढी, बिनु जिहि भौंह-कमान ।  
चलचित-बेझैं चुकति नहिं बंकबिलोकनि-बान ॥३५६॥

दसह दुराज प्रजानु कौं क्यौं न बढै दुख-दंदु ।  
अधिक अँधरौ जग करत मिलि मावस रबि-चंदु ॥३५७॥

ललन-चलनु सुनि पलनु मैं अँसुआ झलके आइ ।  
भई लखाइ न सखिनु हूँ झूठैं हीं जमुहाइ ॥३५८॥

कंचनतन-धन-बरन बर रह्यौ रंगु मिलि रंग ।  
जानी जाति सुबास हीं केसरि लाई अंग ॥३५९॥

खरैं अदब, इठलाहटी, उर उपजावति त्रासु ।  
दुसह संक बिस कौ करै जैसैं सोँठि-मिठासु ॥३६०॥

तौ लगु या मन-मदन मैं हरि आवैं किहिं बाट ।  
बिकट जटे जौ लगु निपट खुटैं न कपट-कपाट ॥३६१॥

है कपूरमनिमय रही मिलि तन-दुति मुकतालि ।  
छिन छिन खरी विचच्छिनौ लखति छावाइ तिनु आलि ॥३६२॥

दृग उरझत, टूटत कुटुम, जुरत चतुर-चित प्रीति ।  
परति गाँठि दुरजन-हियैं, दर्ई, नई यह रीति ॥३६३॥

नहिं नचाइ चितवति दृगनु, नहिं बोलति मुसकाइ ।  
ज्यौं ज्यौं रूखी रूख करति, त्यौं त्यौं चितु चिकनाइ ॥३६४॥

वैसीयै जानी परति झगा ऊजरे माँह ।  
मृगनैनी लपटत जु यह बेनी उपटी बाँह ॥३६५॥

प्यासे दुपहर जेठ के फिरे सबै जलु सोधि ।  
मरुधर पाइ मतीरु हीं मारु कहत पयोधि ॥३६६॥

विषम वृषादित की तृषा जिये मतीरनु सोधि ।  
अमित, अपार, अगाध-जलु मारौ मूड पयोधि ॥३६७॥

निपट लजीली नवल तिय बहकि बारुनी सेइ ।  
त्यौं त्यौं अति मीठी गगति, ज्यौं ज्यौं ढौयौ देइ ॥३६८॥

सरस कुसुम मँडरातु अलि, न झुकि झपटि लपटातु ।  
दरसत अति सुकुमारु तनु, परसत मन न पत्यातु ॥३६९॥

निरदय, नेह नयौ निरखि भयौ जगतु भयभीतु ।  
यह न कहूँ अब लौ सुनी, मरि मारिये जु मीतु ॥३७०॥

भजन कह्यौ, तातैं भज्यौ, भज्यौ न एकौ बार ।  
दूरि भजन जातैं कह्यौ, सो तैं भज्यौ, गँवार ॥३७१॥

नैन लगे तिहिं लगनि जु, न छुटैं छुटैं हूँ प्रान ।  
काम न आवत एक हूँ तेरे सैक सयान ॥३७२॥

उड़ति गुड़ी लखि ललन की अँगना अँगना माँह ।  
बौरी लौ दौरी फिरति छुबति छबीली छँह ॥३७३॥

ऊँचैं चितै सराहियतु गिरह कबूतरु लेतु ।  
झलकति दृग मुलकित बदनु, तनु पुलकित किहि हेतु ॥३७४॥

लागत कुटिल कटाच्छ-सर क्यौ न होहिं बेहाल ।  
कढ़त जि हियहिं दुसाल करि, तऊ रहत नटसाल ॥३७५॥

जनमु जलधि, पानिपु बिमलु, भौ जग आघु अपारु ।  
रहै गुनी है गर-पर्यौ, भलै न मुकता-हारु ॥३७६॥

गहै न नेकौ गुन-गरबु, हँसौ सबै संसारु ।  
कुच-उचपद-लालच रहै गरैं परैं हूँ हारु ॥३७७॥

तच्यौ आँच अब बिरह की, रह्यौ प्रेम-रस भीजि ।  
नैननु कै मग जलु बहै हियौ पसीजि ॥३७८॥

छला परोसिनि हाथ तैं, छलु करि, लियौ, पिछानि ।  
पियहिं दिखायौ लखि बिलखि, रिस-सूचक मुसकानि ॥३७९॥

हटि, हितु करि प्रीतम-लीयौ, कियौ तु सौति सिंगारु ।  
अपनै कर मोतिनु गुह्यौ, भयौ हरा हर-हारु ॥३८०॥

बसै बुराई जासु तन, ताही कौ सनमानु ।  
भलौ भलौ कहि छोड़ियै, खोटैं ग्रह जपु, दानु ॥३८१॥



वै ठाढ़े, उमदाहु उत, जल न बूझै बड़वागि ।  
जाही सौं लाग्यौ हियौ, ताही कै हिय लागि ॥३८२॥

ढीठि परोसिनि ईठि है कहै जु गहे सयानु ।  
सबै सँदेसे कहि कह्यौ मुसकाहट मैं मानु ॥३८३॥

छिनकु चलति, ठठुकति छिनकु, भुज प्रीतम-गल डारि ।  
चढ़ी अटा देखति घटा बिज्जु-छटा सी नारि ॥३८४॥

धनि यह द्वैज, जहाँ लख्यौ, तज्यौ दृगनु दुख-दंदु ।  
तुम भागनु पूरब उयौ अहो ! अपूरबु चंदु ॥३८५॥

लरिका लैबे कै मिसनु लंगरु मो ढिग आइ ।  
गयौ अचानक आँगुरी छती छैल छुवाइ ॥३८६॥

ढीथौ दै बोलति, हँसति पोढ़-बिलास अपोढ़ ।  
त्यौं त्यौं चलत न पिय-नयन छकए छकी नबोढ़ ॥३८७॥

रनित भृंग-घंटावली, झरति दान मधु-नीरु ।  
मंद मंद आवतु चलयौ कुंजरु कुंज समीरु ॥३८८॥

रही रुकी क्यों हूँ चलि, आधिक राति पधारि ।  
हरति तापु सब द्यौस कौ उर लागि यारि बयारि ॥३८९॥

चुवतु स्वेद मकरंद-कन, तरु-तरु-तरु बिरमाइ ।  
आवतु दच्छिन देस तैं थक्यौ बहोटी बाइ ॥३९०॥

पतवारी माला पकरि, और न कछू उपाउ ।  
तरि संसार-पयोधि कौं, हरि-नावैं करि नाउ ॥३९१॥

लपटी पुहुप-पराग-पट, सनी स्वेद मकरन्द ।  
आवति, नारि नबोढ़ लौं, सुखद बायु गति मन्द ॥३९२॥

ललन, सलोने अरु रहे अति सनेह सौं पागि ।  
तनक कचाई देत दुख सूरन लौं मुँह लागि ॥३९३॥

न करु, न डरु, सबु जगु कहतु, कत बिनु काज लजात ।  
सौहैं कीजै नैन, जौ साँची सौहैं खात ॥३९४॥

रहिहैं चंचल प्रान ए, कहि, कौन की आगोट ।  
ललन चलन की चित धरी, कल न पलनु की ओट ॥३९५॥

जौ चाहत, चटक न घटै, मैलौ होइ न, मित्त ।  
रज राजसु न छुवाइ तौ नेह-चीकनों चित्त ॥३९६॥

कोरि जतन कीजै, तऊ नागर-नेहु दुरै न ।  
कहै देत चितु चीकनी नई रुखाई नैन ॥३९७॥

लाल, तुम्हारे रूप की, कहौ, रीति यह कौन ।  
जासौं लागत पलकु दृग लागत पलक पलौ न ॥३९८॥

कालबूत दूती बिना जुरै न और उपाइ ।  
फिर ताकैं टारैं बनै पाकैं प्रेम-लदाइ ॥३९९॥

रह्यौ ऐंचि, अंतु न लहै अवधि-दुसासनु बीरु ।  
आली, बाढतु बिरहु ज्यौं पंचाली कौ चीरु ॥४००॥

यह बरिया नहिं और की, तूँ करिया बह सोधि ।  
पाहन-नाव चढाइ जिहिं कीने पार पयोधि ॥४०१॥

पावक-झर तैं मेह-झर दाहक दुसह बिसेखि ।  
दहै देह वाकै परस याहि दृगनु हीं देखि ॥४०२॥

चलित ललित, श्रम-स्वेदकन-कलित, अरुन मुख तैन ।  
बन-बिहार थाकीतरुनि-खरे थकाए नैन ॥४०३॥

कुढंगु कोप तजि रँग-रली करतिं जुवति जग, जोइ ।  
पावस, गूढ न बात यह, बूढनु हूँ रँगु होइ ॥४०४॥

न जक धरत हरि हिय धरै, नाजुक कमला बाल ।  
भजत, भार-भय-भीत है, घनु, चन्दुन, बनमाल ॥४०५॥

नासा मोरि, नचाड़ जे करी कका की सौंह ।  
काँटे सी कसकैं ति हिय गड़ी कँटीली भौंह ॥४०६॥

क्यों बसियै, क्यों निबहियै, नीति नेह-पुर नाँहि ।  
लगालगी लोड़न करै, नाहक मन बँधि जाँहि ॥४०७॥

ललन-चलनु सुनि चुपु रही, बोली आपु न ईठि ।  
राख्यौ गहि गाढै गरै मनौ गलगली डीठि ॥४०८॥

अपनी गरजनु बोलियत, कहा निहोरौ तोहि ।  
तू प्यारौ मो जीय कौं, मो ज्यौ प्यारौ मोहि ॥४०९॥

रह्यौ चकतु चहुँघा चितै चितु मेरौ मति भूलि ।  
सूर उयै आए, रही दृगनु साँझ सी फूलि ॥४१०॥

अति अगाधु, अति औथरौ नदी, कूपु, सरु, बाड़ ।  
सो ताकौ सागरु, जहाँ जाकी प्यास बुझाइ ॥४११॥

कपट सतर भौहें करीं, मुख अनखौहैं बैन ।  
सहज हसौ हैं जानि कै सौहैं करति न नैन ॥४१२॥

मानहु बिधि तन-अच्छछबि स्वच्छ राखिबैं काज ।  
दृग-पग-पोछन कौं करे भूषन पायंदाज ॥४१३॥

बिरह-बिथा-जल-परस-बिन बसियतु मो-मन-ताल ।  
कछु जानत जल-थंभ-बिधि दुर्जोधन लौं, लाल ॥४१४॥

रुख रूखी मिस-रोष, मुख कहति रुखौं हैं बैन ।  
रूखे कैसें होत ए नेह चीकने नैन ॥४१५॥

पति-रितु-औगुन-गुन बढतु मागु, माह कौ सीतु ।  
जातु कठिन है अति मृदौ रवनी-मनु, नवनीतु ॥४१६॥

त्यौं त्यौं प्यासेई रहत ज्यौं ज्यौं पियत अघाइ ।  
सगुन सलोने रूप की जु न चख-तृषा बुझाइ ॥४१७॥

अरुन-बरन तरुनी-चरन अँगुरी अति सुकुमार ।  
चुवत सुरँग रँगु सी मनौ चपि बिछियनु कैँ भार ॥४१८॥

मोर-मुकट की चंद्रिकनु यौँ राजत नँदनंद ।  
मनु ससिसेखर की अकस किय सेखर सत चंद ॥४१९॥

अधर धरत हरि कैँ, परत ओंठ-दीठि-पट जोति ।  
हरित बाँस की बाँसुरी इंद्रधनुष-रंग होति ॥४२०॥

तौ अनेक औगुन-भरिहिँ चाहै याहि बलाइ ।  
जौ पति संपति हूँ बिना जदुपति राखे जाइ ॥४२१॥

प्रीतम-दृग-मिहचत प्रिया पानि-परस-सुखु पाइ ।  
जानि पिछानि अजान लौँ नैकु न होति जनाइ ॥४२२॥

देखौँ जागत वैसियै साँकर लगी कपाट ।  
कित है आवतु, जातु भजि, को जानै, किहिँ बाट ॥४२३॥

करु उठाइ घूँघटु करत उझरत पट-गुझरौट ।  
सुख-मोटै लूटीँ ललन लखि ललना की लौट ॥४२४॥

करौ कुबत जगु, कुटिलता तजौँ न, दीनदयाल ।  
दुखी होहुगे सरल हिय बसत, त्रिभंगी लाल ॥४२५॥

निज करनी सकुचेहिँ कत सकुचावत इहिँ चाल ।  
मोहूँ से नित-बिमुख-त्यौँ सनमुख रहि, गोपाल ॥४२६॥

मोहिँ तुम्हें बाढी बहस, को जीतै, जदुराज ।  
अपनैँ बिरद की दुहूँ निबाहन लाज ॥४२७॥

दूरि भजत प्रभु पीठि दै गुन-बिस्तारन काल ।  
प्रगतत निर्गुन निकट रहि चंग-रंग भूपाल ॥४२८॥

कहै यहै श्रुति सुम्रत्यौ, यहै सयाने लोग ।  
तीन दबावत निसकहीं पातक, राजा, रोग ॥४२९॥

सो सिर धरि महिमा मही लहियति राजा राइ ।  
प्रगटत जडता अपनियै सु मुकटु पहिरत पाइ ॥४३०॥

को कहि सकै बडेनु सौं लखैबडीयौ भूल ।  
दीने दर्ई गुलाब की इन डारनु वे फूल ॥४३१॥

समै समै सुन्दर सबै, रूपु कुरुपु न कोइ ।  
मन की रुचि जेती जितै, तित तेती रुचि होइ ॥४३२॥

या भव-पारावार कौं उलँघि पार को जाइ ।  
तिय-छबि छयाग्राहिनी ग्रहै बीचहीं आइ ॥४३३॥

दिन दस आदरु पाइ कै करि लै आपु बखानु ।  
जौ लागि काग ! सराधपखु , तौ लागि तौ सनमानु ॥४३४॥

मरतु प्यास पिंजरा-पर्यौ सुआ समै कै फेर ।  
आदरु दै दै बोलियतु बाइसु बलि की बेर ॥४३५॥

वेई कर, ब्यौरिन वहै, ब्यौरौ कौन विचार ।  
जिनहीं उरझ्यौ मो हियौ, तिनहीं सुरझे बार ॥४३६॥

इहीं आस अटक्यौ रहतु अलि गुलाब कै मूल ।  
हैहै फेरि बसंत ऋतु इन डारनु वे फूल ॥४३७॥

वे न इहाँ नागर, बढी जिन आदर तो आब ।  
फूल्यौ अनफूल्यौ भयौ गवँई-गाँव, गुलाब ॥४३८॥

चल्यौ जाइ, ह्याँ कौ करै हाथिनु के व्यापार ।  
नहिं जानतु, इहिं पुर बसैं धोबी, ओइ, कुँभार ॥४३९॥

खरी लसति गोरै धँसति पान की पीक ।  
मनौ गुलीबँद-लाल की, लाल, लाल दुति-लीक ॥४४०॥

पाइल पाइ लगी रहै, लगौ अमोलिक लाल ।  
भोडर हूँ की भासिहै बेंदी भामिनी-भाल ॥४४१॥

कुटिल अलक छुटि परत मुख बढिगौ इतौ उदोतु ।  
बंक बकारी देत ज्यौं दामु रुपैया होतु ॥४४२॥

रहि न सक्यौ, कसु करि रह्यौ, बस करि लीनौ मार ।  
भेदि दुसार कियौ तन-दुति, भेदै सार ॥४४३॥

खल-बढई बलु करि धके, कटै न कुबत-कुठार ।  
आलबाल उर झालरी खरी प्रेम-तरु-डार ॥४४४॥

स्यौं बिजुरी मनु मेह आनि इहाँ बिरहा धरे ।  
आठौ जाम, अछेह, दृग जु बरत बरसत रहत ॥४४५॥

कत बेकाज चालाइयति चतुराई की चाल ।  
कहे देति यह रावरे सब गुन निरगुन माल ॥४४६॥

उनकौ हितु उन्हीं बनै, कोऊ करौ अनेकु ।  
फिरतु काकगोलकु भयौ दुहूँ देह ज्यौ एकु ॥४४७॥

गडे, बडे छबि-छाक, छिगुनी-छोर छुटैन ।  
रहे सुरंग रंग रँगि उहीं नह-दी महदी नैन ॥४४८॥

बाढतु तो उर उरज-भरु भरि तरुनई-बिकास ।  
बोझनु सौतिनु कै हियै आवति रूँधि उसास ॥४४९॥

अलि, इन लोइन-सरनु कौ खरौ विषम संचारु ।  
लगै लगाएँ एक से दुहूँनु करत सुमारु ॥४५०॥

मूड चढाएँऊ रहै पर्यौ पीठि कच-भारु ।  
रहै गरै परि, राखिबौ तऊ हियै पर हारु ॥४५१॥

करतु जातु जेती कटनि बढि रस-सरिता-सोतु ।  
आलबाल उर प्रेम-तरु तितौ तितौ दृढ होतु ॥४५२॥

राति द्यौस हौंसे रहै, मानु न ठिकु ठहराइ ।  
जेतौ औगुनु दूढियै, गुनै हाथ परि जाइ ॥४५३॥

मनु न मनावन कौं करै, देतु रुठाइ रुठाइ ।  
कौतुक-लाग्यौ प्यौ प्रिया-खिझहूँ रिझवति जाइ ॥४५४॥

बिरह-बिपति-दिनु परत हीं तजे सुखनु सब अंग ।  
रहि अब लौं ऽब दुखौ भए चलाचलै जिय-संग ॥४५५॥

नयै बिरह बढती बिथा खरी बिकल जिय बाल ।  
बिलखी देखि परोसिन्यौ हरखि हँसी तिहिं काल ॥४५६॥

छतौ नेहु कागर हियै, भई लखाइ न टाँकु ।  
बिरह-तचै उधर्यौ सु अब सेंहुइ कैसो आँकु ॥४५७॥

फूलीफाली फूल सी फिरति जु बिमल-बिकास ।  
भोरतरैयाँ होहु ते चलत तोहिं पिय-पास ॥४५८॥

अरी, खरी सटपट परी बिधु आधैं मग हेरि ।  
संग-लगै मधुपनु लई भागनु गली अँधेरि ॥४५९॥

चलतु धेरु घर घर, तऊ घरी न घर ठहराइ ।  
समुझि उहीं घर कौं चलै, भूलि उहीं घर जाइ ॥४६०॥

इक भीजै, चहलै परै, बूडै, बहै हजार ।  
किते न औगुन जग करै बै-नै चढती बार ॥४६१॥

गाडैं ठाडैं कुचनु ठिलि पिय-हिय को ठहराइ ।  
उकसौहैं हीं तो हियै दर्ई सबै उकसाइ ॥४६२॥

दीप उजेरै हू पतिहिं हरत बसनु रति-काज ।  
रही लपटि छबि की छटनु, नैकी छुटी न लाज ॥४६३॥

लखि दौरत पिय-कर-कटक बास-छुडावन-काज ।  
बरुनी-वन गाडैं दृगनु रही गुद्वौ करि लाज ॥४६४॥

सकुचि सुरत-आरंभ हीं बिछुरी लाज लजाइ ।  
ढरकि ढार ढुरि ढिग भई ढीठि ढिठाई आइ ॥४६५॥

सकुचि सरकि पिय-निकट तैं, मुलकि कछुक, तनु तोरि ।  
कर आँचर की ओट करि, जमुहानी मुँहु मोरि ॥४६६॥

देह-लग्यौ ढिग गेहपति, तऊ नेहु निरबाहि ।  
नीची अँखियनु हीं इतै गई कनखियनु चाहि ॥४६७॥

मार्यौ मनुहारिनु भरी, गार्यौ खरी मिठाहिं ।  
वाकौ अति अनखाहटौ मुसकाहट-बिनु नाहिं ॥४६८॥

नाचि अचानक हीं उठे बिनु पावस बन मोर ।  
जानति हौं, नंदित करी यह दिसि नंदकिसोर ॥४६९॥

मैं यह तोहीं मैं लखी भगति अपूरब, बाल ।  
लहि प्रसाद-माला जु भौ तनु कदंब की माल ॥४७०॥

जाकैं एकाएक हूँ जग ब्यौसाइ न कोइ ।  
सो निदाघ फूलै फरै आकु उहडहौ होइ ॥४७१॥

बतरस-लालच लाल की, मुरली धरी लुकाइ ।  
सौह करै, भौहनु हँसै, दैन कहै नटि जाइ ॥४७२॥

रही लटू है लाल, हौं लखि वह बाल अनूप ।  
कितौ मिठास दयौ दर्ई इतैं सलोनै रूप ॥४७३॥

नहिं पावसु, ऋतुराज यह, तजि, तरवर, चित-भूल ।  
अपनु भएँ बिनु पाइहै क्यौं नव दल, फल, फूल ॥४७४॥

बन-बाटनु पिक-बटपरा लखि बिरहिनु मत मैंन ।  
कुहौ कुहौ कहि कहि उठैं, करि करि राते नैन ॥४७५॥

दिसि दिसि कुसुमित देखियत उपबन-बिपिन-समाज ।  
मनहुँ बियोगिनु कौं कियौ सर-पंजर रितुराज ॥४७६॥

टटकी धोई धोवती, चटकीली मुख-जोति ।  
लसति रसोई कै बगर, जगरमगर दुति होति ॥४७७॥



सोहति धोती सेत मैं कनक-बरन-तन बाल ।  
सादर-बारद-बिजुरी-भा रद कीजति, लाल ॥४७८॥

बहु धनु लै, अहसानु कै, पारौ देत सराहि ।  
बैद-बधू, हँसि भेद सौं, रही नाह-मुँह चाहि ॥४७९॥

रहौ, गुही बेनी, लखे गुहिबे के त्योंनार ।  
लागे नीर चुचान, जे नीठि सुकाए बार ॥४८०॥

मीत, न नीति गलीतु है जौ धरियै धनु जोरि ।  
खाएँ खरचें जो जुरै, तौ जोरियै करोरि ॥४८१॥

दुरै न निघरघट्यौ दियै ए रावरी कुचल ।  
बिषु सी लागति है बुरी हँसी खिसी की, लाल ॥४८२॥

छले परिबे कैं डरनु सकै न हाथ छुवाइ ।  
झझकत हियै गुलाब कैं झँवा झँवैयत पाइ ॥४८३॥

तिय-सरसौं हैं मुनि किए करि सरसौं हैं नेह ।  
धर-परसौं हैं है रहे झर-बरसौं हैं मेह ॥४८४॥

घन-घेरा छुटि गौ, हरषि चली चहूँ दिसि राह ।  
कियौ सुचैनौ आइ जगु सरद-सूरनरनाह ॥४८५॥

पावस-घन अँधियार महि रह्यौ भेदु नहि आनु ।  
रात द्यौस जान्यौ परतु लखि चकई चकवानु ॥४८६॥

अरुनसरोरुह-कर-चरन, दृग-खंजन, मुख-चंद ।  
समै आइ सुंदरि सरद काहि न करति अनंद ॥४८७॥

नाहिन ए पावक-प्रबल, लुवै चलै चहुँ पास ।  
मानहु बिरह बसंत कैं, ग्रीषम-लेत उसास ॥४८८॥

कहलाने एकत बसत अहि मयूर, मृग बाघ ।  
जगतु तपोबन सौ कियौ दीरघ-दाघ निदाघ ॥४८९॥

पग पग मग अगमन परत चरन-अरुनदुति झूलि ।  
ठौर ठौर लखियत उठे दुपहरिया से फूलि ॥४९०॥

नीच हियैं दुलसे रहैं गहे गेंद के पोत ।  
ज्यौं ज्यौं माथैं मारियत, त्यों त्यों ऊँचे होत ॥४९१॥

ज्यौं ज्यौं बढ़ति बिभावरी, त्यों त्यों बढ़त अनंत ।  
ओक ओक सबलोक-सुख, कोक-सोक हेमंत ॥४९२॥

रह्यौ मोहु, मिलनौ रह्यौ, यौं कहि गहौं मरोर ।  
उत दै सखिहि उराहनौ इत चितई मो ओर ॥४९३॥

नहिं हरि लौं हियरा धरौ, नहिं हर लौं अरधंग ।  
एकत ही करि राखियै अंग अंग प्रति अंग ॥४९४॥

कियौ सबै जगु काम-बस, जीते जिते अजेइ ।  
कुसुमसरहिं सर धनुष कर अगहनु गहन न देह ॥४९५॥

छकि रसाल-सौरभ, सने मधुर माधुरी-गंध ।  
ठौर ठौर झौरत झँपत भौर-झौर मधु-अंध ॥४९६॥

मिलि बिहरत, बिछुरत मरत, दंपति अति रति-लीन ।  
नूतन बिधि हेमन्त सबु जगतु जुराफा कीन ॥४९७॥

पल सोहैं पगि पीक-रँग, छल सोहैं सब बैन ।  
बल-सौहैं कत कीजियत ए अलसौहैं नैन ॥४९८॥

कत लपटइयतु मो गरैं; सो न, जु ही निसि सैन ।  
जिहिं चंपक-बरनी किए गल्लाला-रँग नैन ॥४९९॥

नैक उतै उठि बैठियै, कहा रहे गहि गोहु ।  
छुटी जाति नह-दी छिनकु महदी सूकन देहु ॥५००॥

लटुवा लौं प्रभु-कर-गहैं निगुनी गुन लपटाइ ।  
वहै गुनी-कर तैं छुटैं निगुनीयै है जाइ ॥५०१॥

है हिय रहति हई छई, नई जुगति जग जोड़ ।  
दीठिहिं दीठि लगै, दर्ई, देह दूबरी होइ ॥५०२॥

जज्यौं उझकि झाँपति बदन, झुकति बिहँसि, सतराड़ ।  
तत्यौं गुलाल-मुठी झुठी झझकावत प्यौ जाइ ॥५०३॥

छिनकु, छबीले लाल, वह नहिं जौ लागि बतराति ।  
ऊख, महूष, पियूष की तौ लागि भूख न जाति ॥५०४॥

अँगुरिनु उचि, भरु भीति दै, उलमि चितै चख लोल ।  
रुचि सौं दुहूँ दुहूँनु के चूमे चारु कपोल ॥५०५॥

नागरि, बिबिध बिलास तजि, बसी गवेलिनु माँहि ।  
मूढनि मैं गनबी कि तूँ, हूठ्यौ दै इठलाहिं ॥५०६॥

बिथुर्यौ जावकु सौति-पग निरखि हँसी गहि गाँसु ।  
सलज हँसौंहीं लखि लियौ आधी हँसी उसाँसु ॥५०७॥

मोसौं मिलवति चातुरी, तूँ नहिं भानति भेउ ।  
कहे देत यह प्रगट हीं प्रगट्यौ पूस पसेउ ॥५०८॥

सौहैं हूँ हेर्यौ न तैं, केती द्याई सौंह ।  
एहो, क्यौं बैठी किए ऐंटी ग्वैठी भौंह ॥५०९॥

हीं औरै सी है गई टरी औधि कैं नाम ।  
दूजैं कै डारी खरी बौरी बौरै आम ॥५१०॥

सही रँगीलैं रति-जगैं पगी सुख चैन ।  
अलसौहैं सौहैं कियैं कहैं हँसौहैं नैन ॥५११॥

कहा कुसुम, कह कौमुदी, कितक आरसी जोति ।  
जाकी उजराई लखैं आँखि ऊजरी होति ॥५१२॥

पहिरत हीं गोरैं गरैं यौं दौरी दुति, लाल ।  
मनौ परसि पुलकित भई बौलसिरी की माल ॥५१३॥

रस-भिजए दोऊ दुहुनु, तउ टिकि रहे, टरै न ।  
छबि सौं छिरकत प्रेम-रँगु भरि पिचकारी नैन ॥५१४॥

कारे-बरन डरावने कत आवत इहिं गेह ।  
कै वा लखी, सखी लखैं लगै थरथरी देह ॥५१५॥

कर के मीडे कुसुम लौं गई बिरह कुम्हिलाइ ।  
सदा-समीपिनी सखिनु हूँ नीठि पिछनी जाइ ॥५१६॥

चितवत, जितवत हित हियैं, कियैं तिरीछे नैन ।  
भीजैं तन दोऊ कँपैं क्यौं हूँ जप निबरैं न ॥५१७॥

कियौ जु, चिबुक उठाइ कै, कंपित कर भरतार ।  
टेढ़ीयै टेढ़ी फिरति टेढ़ैं तिलक लिलार ॥५१८॥

भौ यह ऐसोई समौ, जहाँ सुखद दुखु देत ।  
चैत-चाँद की चाँदनी डारति किए अचेत ॥५१९॥

कत कहियत दुखु देन कौं रचि रचि बचन अलीक ।  
सबै कहाउ रह्यौ लखैं, लाल, महावर लीक ॥५२०॥

लोपे कोपे इंद्र लौं रोपे प्रलय अकाल ।  
गिरिधारी राखे सबै गो, गोपी, गोपाल ॥५२१॥

ढोरी लाई सुनन की, कहि गोरी मुसकात ।  
थोरी थोरी सकुचि सौं भोरी भोरी बात ॥५२२॥

आज कछू औरै भए, छए नए ठिकठैन ।  
चित के हित के चुगल ए नित के होहिं न नैन ॥५२३॥

छुटै न लाज, न लालचौ प्यौ लखि नैहर-गेह ।  
सटपटात लोचन खरे भरे सकोच, सनेह ॥५२४॥

ह्याँ तैं ह्याँ, तैं इहाँ, नैकौ धरति न धीर ।  
निसि दिन डाढ़ी सी फिरति बाढ़ी गाढ़ी पीर ॥५२५॥

बिरह-बिकल बिनु ही लिखी पाती दर्ई पठाइ ।  
आँक-बिहूनीयौ सुचित सूनेँ बाँचत जाइ ॥५२६॥

समरस-समर-सकोच-बस-बिबस न ठिक ठहराइ ।  
फिरि फिरि उझकति, फिरि दुरति, दुरि दुरि उझकति आइ ॥५२७॥

फिरत जु अटकत कटनि-बिनु, रसिक, सु रस न, खियाल ।  
अनत अनत नित नित हितनु चित सकुचत कत, लाल ॥५२८॥

अरै परै न, करै हियौ खरै जरै पर जार ।  
लावत घोरि गुलाब सौँ, मलै मिलै घनसार ॥५२९॥

दोऊ चोरमिहीचनी खेलु न खेलि अघात ।  
दुरत हियै लपटाइ कै, छुवत हियै लपटात ॥५३०॥

मिसि हीं मिसि आतप दुसह दर्ई और बहराइ ।  
चले ललन मनभावतिहिं तन की छाँह छिपाइ ॥५३१॥

लहलहाति तन तरु नई लचि लग लौं लफि जाइ ।  
लगै लाँक लोइन-भरी लोइनु लेति लगाइ ॥५३२॥

रही अचल सी है, मनौ लिखी चित्र की आहि ।  
तजै लाज, उरु लोक कौ, कहौ, बिलोकति काहि ॥५३३॥

पल न चलै, जकि सी रही, थकि सी रही उसास ।  
अबहीं तनु रितयौ, कहौ, मनु पठ्यौ किहिं पास ॥५३४॥

मैं लै दयौ, लयौ सु, कर छुवत छिनकि गौ नीरु ।  
लाल, तिहारौ अरगजा उर है लग्यौ अभीरु ॥५३५॥

चलौ, चलै छुटि जाइगौ हटु रावरै सँकोच ।  
खरे चढाए हे, ति अब आए लोचन लोच ॥५३६॥

कहे जु बचन बियोगिनी बिरह-बिकल बिललाइ ।  
किए न को अँसुआ-सहित सुवा ति बोल सुनाइ ॥५३७॥

छिप्यौ छबीली मुँहु लसै नीलैं अंचर-चीर ।  
मनौ कलानिधि झलमलै कालिंदी कै नीर ॥५३८॥

मानु तमासौ करि रही बिबस बारुनी सेइ ।  
झुकति, हँसति; हँसि झुकति, झुकि झुकि हँसि हँसि देइ ॥५३९॥

सदन सदन के फिरन की सद न छुटै, हरिराइ ।  
रुचै; तितै बिहरत फिरौ; कत बिहरत उरु आइ ॥५४०॥

प्रलय-करन बरषन लगे जुरि जलधर इकसाथ ।  
सुरपति-गरबु हर्यौ हरषि गिरिधर गिरि धरि हाथ ॥५४१॥

करे चाह सौं चुटकि कै खरै उड़ौहैं मैन ।  
लाज नवाएँ तरफत, कत खूँद सी नैन ॥५४२॥

ज्यौं ज्यौं आवति निकट निसि, ज्यौं त्यों खरी उताल ।  
झमकि झमकि टहलै करै लगी रहचटै बाल ॥५४३॥

रही, पैज कीनी जु मै; दीनी तुमहिं मिलाइ ।  
राखहु चंपकमाल लौं, लाल, हियै लपटाइ ॥५४४॥

दोऊ चाह-भरे कछू चाहत कह्यौ, कहैं न ।  
नहिं, जाँचकु सुनि, सूमलौं बाहिर निकसत बैन ॥५४५॥

सुभर भर्यौ तुवगुन-कननु, पक्यौ कपट-कुचाल ।  
क्यौं धौं, दार्यौ ज्यौ, हयौ दरकतु नाहिंन, लाल ॥५४६॥

चितु दै देखि चकोर-त्यौं, तीजै भजै न भूख ।  
चिनगी चुगै अँगार की, चुगै कि चंद मयूख ॥५४७॥

तुहूँ कहति, हौं आपु हूँ समुझति सबै सयानु ।  
लखि मोहनु जौ मनु रहै, तौ मन राखौं मानु ॥५४८॥

धुरवा होहिं न, अलि, उठै धुवाँ धरनि-चहुँकोद ।  
जारत आवत जगत कौं पावस-प्रथमपयोद ॥५४९॥

नख-रुचि-चूरनु डारि कै, ठगि लगाइ, निज साथ ।  
रह्यौ राखि हठि लै गए हथाहथी मनु हाथ ॥५५०॥

चलत देत आभारु सुनि उहीं परोसिहिं नाह ।  
लसी तमासे की दृगनु हाँसी आँसुनु माँह ॥५५१॥

सुरति न ताल न तानन की, उठ्यौ न सुरु ठहराइ ।  
एरी, रागु बिगारि गौ बैरी बोलु सुनाइ ॥५५२॥

प्रजर्यौ आगि बियोग की, बह्यौ बिलोचन-नीर ।  
आठौं जाम हियौ रहै उड्यौ उसास-समीर ॥५५३॥

उरु उरुझ्यौ चितचोर सौं, गुरु गुरुजन की लाज ।  
चढ़ै हिडोरें सैं हियैं कियैं बनै गृह-काज ॥५५४॥

पट सौं पोंछित परी करी, खरी-भयानक-भेष ।  
नागिनि है लागति दृगनु नागबेलि-रँग-रेख ॥५५५॥

तो लखि मो मन जो लही, सो गति कही न जाति ।  
ठोड़ी-गाड़ गड़्यौ तऊ उड्यौ रहै दिन राति ॥५५६॥

(सोरठा)

मैं लखि नारी-ज्ञानु करि राख्यौ निरधारु यह ।  
बहई रोग-निदानु, वहै बैदु, औषधि वहै ॥५५७॥

(दोहा)

जो तिय तुम मनभावती राखी हियैं बसाइ ।  
मोहिं झुकावति दृगनु है वहई उझकति आइ ॥५५८॥

दोऊ अधिकार्ई-भरे एकैं गौं गहराइ ।  
कौनु मनबै, कौ मनै, माने मन ठहराइ ॥५५९॥

उर लीनै अति चटपटी, सुनि मुरली-धुनि, धाइ ।  
हौं निकसी हुलसी, सु तौ गौ हुल सी हिय लाइ ॥५६०॥

ब्रजबासिनु कौ उचित धनु, जो धन रुचित न कोइ ।  
सु चित न आयौ; सुचितई, कहौ, कहाँ तैं होइ ॥५६१॥

हतु न हठीली करि सकैं यह पावस-ऋतु पाइ ।  
आन गाँठि घुटि जाइ, त्यों मान-गाँठि छुटि जाइ ॥५६२॥

वेऊ चिरजीवी, अमर निधरक फिरौ कहाइ ।  
छिनु बिछुरैं जिनकी नहीं पावस आइ सिराइ ॥५६३॥

भेटत बन न भावतौ, चितु तरसतु अति प्यार ।  
धरति लगाइ लगाइ उर भूषन, बसन, हथ्यार ॥५६४॥

वाही दिन तैं मिट्यौ मानु, कलह कौ मूलु ।  
भलैं पधारे, पाहुने, है गुडहर कौ फूलु ॥५६५॥

मोहिं लजावत, निलज ए हुलसि मिलत सब गात ।  
भानु-उदै की ओस लौं मानु न जानति जात ॥५६६॥

(सोरठा)

तो तन अबधि-अनूप रूपु लग्यौ सब जगत कौ ।  
मो दृग लागे रूप, दृगनु लगी अति चटपटी ॥५६७॥

रहैं निगोडे नैन डिगि, गहैं न चेत अचेत ।  
हौं कसु कै रिस के करौं, ये निसुके हँसि देत ॥५६८॥

मोहूँ सौं बातनु लगैं लगी जीभ जिहि नाइ ।  
सोई लै उर लाइयै, लाल, लागियतु पाइ ॥५६९॥

नावक-सर से लाइ कै, तिलकु तरुनि इत ताँकि ।  
पावक-उर सी झमकि कै, गई झरोखा झाँकि ॥५७०॥

सुख सौं बीती सब निसा, मनु सोए मिलि साथ ।  
मूका मेलि गहे, सु छिनु हाथ न छोडे हाथ ॥५७१॥



बाम बाँह, फरकति, मिलैँ जौ हरि जीवनमूरि ।  
तौ तोहीं सौँ भेटिहौँ राखि दाहिनी दूरि ॥५७२॥

छुटे छुटावत जगत तैं सटकारे, सुकुमार ।  
मनु बाँधत बेनी-बँधे नील, छबीले बार ॥५७३॥

इहीं बसंत न खरी, अरी, गरम न सीतल बात ।  
कहि, क्यौँ झलके देखियत पुलक, पसीजे गात ॥५७४॥

चित पितमारक-जोगु गनि भयौ, भयैँ सुत, सोगु ।  
फिरि हुलस्यौँ जिय जोइसी समुझैँ जारज-जोगु ॥५७५॥

चमचमात चंचल नयन बिच घूँघट-पट झीन ।  
माहुँ सुरसरिता-बिमलजल उछरत जुग मीन ॥५७६॥

रहि मुँहु फेरि कि हेरि इत; हित-समहौ चितु, नारि ।  
डीठि-परस उठि पीठि के पुलके कहैँ पुकारि ॥५७७॥

बिछुरैँ जिए, सकोच इहिँ बोलत बनत न बैन ।  
दोऊ लगे हियैँ किए लजौहैँ नैन ॥५७८॥

मोहिँ करत कत बावरी, करैँ दुराउ दुरैँन ।  
कहे देत रँग राति के रँग-लिचुरत से नैन ॥५७९॥

छिपैँ छिपाकर छिति छुवैँ तम ससिहरि न, सँभारि ।  
हँसति हँसति चलि, ससिमुखी, मुख तैं आँचरु टारि ॥५८०॥

अपनैँ अपनैँ मत लगे बादि मचावत सोरु ।  
ज्यौँ त्यौँ सबकौँ सेइबौँ एकैँ नंदकिसोरु ॥५८१॥

लहि सूनैँ घर करु गहत दिठादिठी की ईठि ।  
गड़ी सु चित नाही करति करि ललचौँहीं डीठि ॥५८२॥

पिय कैँ ध्यान गही गही रही वही है नारि ।  
आपु आपु हीँ आरसी लखि रीझति रिझवारि ॥५८३॥

बुरौ बुराई जौ तजै, तौ चितु खरौ डरातु ।  
ज्यौं निकलंकु मयंकु लखि गनै लोग उतपातु ॥५८४॥

मरिबे कौ साहसु ककै बढै बिरह की पीर ।  
दौरति है समुही ससी, सरसिज, सुरभि-समीर ॥५८५॥

कब की ध्यान-लगी लखौं, यह धरु लगीहै काहि ।  
डरियतु भृंगी-कीट लौं मति बहई है जाइ ॥५८६॥

बिलखी लखै खरी खरी भरी अनख, बैराग ।  
मृगनैनी सैन न भजै लखि बेनी के दाग ॥५८७॥

अनियारे, दीरघ दृगनु किती न सरुनि समान ।  
वह चितवनि औरै कछू, जिहि बस होत सुजान ॥५८८॥

झुकि झुकि झपकौं हैं पलनु, फिरि फिरि जुरि, जमुहाइ ।  
बींदि पिआगम, नींद-मिसि, दीं सब अली उठाइ ॥५८९॥

ओछे बडे न है सकैं, लगौ सतर है गैन ।  
दीरघ होहि न नैक हूँ फारि निहारै नैन ॥५९०॥

गहौ अबोलौ बोलि प्यौ आपुहि पठै बसीठि ।  
दीठि चुगाई दुहुनु की लखि सकुचौंहीं दीठि ॥५९१॥

दुखाहाइनु चरचा नहीं आनन आनन आन ।  
लगी फिरै ठूका दिए कानन कानन कान ॥५९२॥

हितु करि तुम पठयौ, लगै वा बिजना की बाइ ।  
टली तपति तन की, तऊ चली पसीना-न्हाइ ॥५९३॥

ध्यान आनि ढिग प्रानपति रहति मुदित दिन राति ।  
पलकु कँपति, पुलकति पलकु, पलकु पसीजति जाति ॥५९४॥

सकै सताइ न तुम बिरहु, निसि दिन सरस, सनेह ।  
रहै वहै लागी दृगनु दीपसिखा सी देह ॥५९५॥

बिरह-जरी लखि जीगननु कह्यौ न डाहि कै बार ।  
अरी, आउ भजि भीतरी, बरसत आजु अँगार ॥५९६॥

फिरि घर कौ नूतन पथिक चले चकित-चित भागि ।  
फूल्यौ देखि पलासु बन, समुही समुझि दवागि ॥५९७॥

गड़ी कुटुम की भीर मैं रही बैठि दै पीठि ।  
तऊ पलकु परि जाति इत सलज, हँसौही डीठि ॥५९८॥

नाउँ सुनत हीं ह्वै गयौ तनु औरै, मनु और ।  
दबै नहीं चित चढ़ि रह्यौ अबै चढ़ायें त्यौर ॥५९९॥

दुसह सौति-सालैं, सु हिय गुनति न नाह-बियाह ।  
धरे रूप गुन कौ गरबु फिरै अछेह उछह ॥६००॥

डिगत पानि डिगुलात गिरि लखि सब ब्रज बेहाल ।  
कंपि किसोरी दरसि कै, खरैं लजाने लाल ॥६०१॥

और सबै हरसी हँसति, गावति भरी उछह ।  
तुँही, बहू, बिलखी फिरै क्यौं देवर कै ब्याह ॥६०२॥

बाल छबीली तियनु मैं बैठी आपु छिपाइ ।  
अरगट हीं पानूस सी परगट होति लखाइ ॥६०३॥

एरी, यह तेरी, दर्ई, क्यौं हूँ प्रकृति न जाइ ।  
नेह-भरैं हिय राखियै, तउ रूखियै लखाइ ॥६०४॥

इहिं काँटैं मो पाइ गडि लीनी मरति जिवाइ ।  
प्रीति जनावत भीति सौं मीत जु काढ्यौ आइ ॥६०५॥

नाँक चढ़ै सीबी करै जितै छबीली छैल ।  
फिरि फिरि भूलि वहै गहै प्यौ कँकरीली गैल ॥६०६॥

नटि न, सीस साबित भई लुटी सुखनु की मोट ।  
चुप करि ए चारी करति सारी-परी सलोट ॥६०७॥

जिहिं भामिनी भूषनु रच्यौ चरन-महावर भाल ।  
उहीं मनौ अँखियाँ रँगी ओठनु कै रँग, लाल ॥६०८॥

तूँ मोहन-मन गडि रही गाढ़ी गड़नि, गुबालि ।  
उठै सदा नटसाल ज्याँ सौतिनु कै उर सालि ॥६०९॥

लाज-लगाम न मानहीं, नैना मो बस नाहिं ।  
ए मुँहजोर तुरंग ज्याँ, ऐंचत हूँ चलि जाहिं ॥६१०॥

कर-मुँदरी की आरसी, प्रतिबिंबित प्यौ पाड़ ।  
पीठि दियै निधरक लखै, इकटक डीठि लगाड़ ॥६११॥

इती भीर हूँ भेदि कै, कित हूँ ह्वै, इत आड़ ।  
फिरै डीठि जुरि डीठि सौ सबकी डीठि बचाड़ ॥६१२॥

लाई, लाल बिलोकियै, जिय की जीवन-मूलि ।  
रही भौन के कोन मैं सोनजुही सी फूलि ॥६१३॥

ओठु ऊँचै, हाँसी-भरी दृग भौहनु की चाल ।  
मो मनु कहा न पी लियौ, पियत तमाकू, लाल ॥६१४॥

जे तब होत दिखादिखी भई अमी इक आँक ।  
दगै तिरीछी डीठि अब ह्वै बीछी कौ डाँक ॥६१५॥

नैकौ उहिं न जुदी करी, हरषि जु दी तुम माल ।  
उर तै बासु छुट्यौ नहीं बास छुटै हूँ, लाल ॥६१६॥

बिहँसि बुलाड़, बिलोक उत प्रौढ तिया रस घूमि ।  
पुलकि पसीजति, पूत कौ पिय-चूम्यौ मुँहु चूमि ॥६१७॥

देख्यौ अनदेख्यौ कियौ, अँगु अँगु सबै दिखाड़ ।  
पैठति सी तन मैं सकुचि बैठी चितै लजाड़ ॥६१८॥

पटु पाँखै, भखु काँकरै, सपर परेई संग ।  
सुखी, परेवा, पुहुमि मैं एकै तुँहीं, बिहंग ॥६१९॥

अरे, परेखी कौ करै, तुँहीं बिलोकि बिचारि ।  
किहिं नर, किहिं सर राखियै खरै बढैं परिपारि ॥६२०॥

तौ, बलियै, भलिये बनी, नागर नंदकिसोर ।  
जौ तुम नीकैं के लख्यौ मो करनी की ओर ॥६२१॥

चाह भरीं, अति रस भरीं, बिरह भरीं सब बात ।  
कोरि संदेसे दुहुनु के चले, पौरि लौं जात ॥६२२॥

सुनि पग-धुनि चितई इतै न्हाति दियै हीं पीठि ।  
चकी, झुकी, सकुची, डरी, हँसी लजी सी डीठि ॥६२३॥

कर लै, सूँघि सराहि कै हूँ रहे सबै गहि मौनु ।  
गंधी अंध, गुलाब कौ गँवई गाहकु कौनु ॥६२४॥

मिलि चलि, चलि मिलि, मिलि चलत आँगन अथयौ भानु ।  
भयौ मुहूरत भोर कौ पौरिहिं प्रथमु मिलानु ॥६२५॥

पचरँग-रँग-बेंदी खरी उठै ऊगि मुख-जोति ।  
पहिरै चीर चिनौटिया चटक चौगुनी होति ॥६२६॥

हँसि ओठनु-बिच, करु उचै, कियै निचौहैं नैन ।  
खरै अरै प्रिय कैं प्रिया लगी बिरी मुख दैन ॥६२७॥

वारौं, बलि, तो दृगनु पर अलि, खंजन, मृग, मीन ।  
आधीडीठि-चितौनि जिहिं किए लाल आधीन ॥६२८॥

जात सयान अयान है, वै ठग काहि ठगैन ।  
को ललचाइ न लाल के लखि ललचौहैं नैन ॥६२९॥

लखि लखि अँखियनु, अधखुलिनु आँगु मोरि, अँगराइ ।  
आधिक उठि, लेटति लटकि, आलस-भरी जम्हाइ ॥६३०॥

प्रेम अडोलु डुलै नहीं मुँह बोलैं अनखाइ ।  
चित उनकी मूरति बसी, चितवनि माँहि लखाइ ॥६३१॥

नाक मोरि, नाही ककै नारि निहोरै लेइ ।  
छुवत ओठ बिय आँगुरिनु बिरी बदन प्यौ देइ ॥६३२॥

गिरै कंपि कछु, कछु रहै कर पसीजि लपटाइ ।  
लैयौ मुठी गुलाल भरि छुटत झुठी है जाइ ॥६३३॥

देखत कछु कौतिगु इतै; देखौ नैक निहारि ।  
कब की इकटक डटि रही टटिया अँगुरिनु फारि ॥६३४॥

कर लै, चूमि चढाइ सिर, उर लगाइ, भुज भेटि ।  
लहि पाती पिय की लखति, बाँचति धरति समेटि ॥६३५॥

चकी जकी सी है रही, बूझ बोलति नीठि ।  
कहूँ डीठि लागी, लगी कै काहूँ की डीठि ॥६३६॥

भावरि-अनभावरि करौ कोरि बकवादु ।  
अपनी अपनी भाँति कौ छुटै न सहजु सवादु ॥६३७॥

दूर्यौ खरे समीप कौ लेत मानि मन मोदु ।  
होत दुहुनु के दृगनु हीं बतरसु, हँसी-बिनोदु ॥६३८॥

मुखु उघारि पिउ लखि रहत रह्यौ न गौ मिस-सैन ।  
फरके ओठ, उठे पुलक, गए उघरि जु रि नैन ॥६३९॥

पिय-मन रुचि-हैबौ कठिनु, तन-रुचि होहु सिंगार ।  
लाखु करौ, आँखि न बढैं बढैं बढाएँ बार ॥६४०॥

मनमोहन सौँ मौहु करि, तूँ घनस्यामु निहारि ।  
कुंजबिहारी सौँ बिहरि, गिरधारी उर धारि ॥६४१॥

मैं मिसहा सोयै समुझि, मुँहु चूम्यौ ढिग जाइ ।  
हँस्यौ, खिसानी, गल गह्यौ, रही गरै लपटाइ ॥६४२॥

नीठि नीठि उठि बैठि हूँ प्यौ प्यारी परभात ।  
दोऊ नींद भरै खरै, गरै लागि, गिरि जात ॥६४३॥

तनक झूठ न सवादिली कौन बात परि जाइ ।  
तिय-मुख रति-आरंभ की नहिं झूठियै मिठाइ ॥६४४॥

नहिं अन्हाइ, नहिं जाइ घर, चितु चिहुँट्यौ तकि तीर ।  
परसि, फुरहरी लै फिरति बिहँसति, धँसति न नीर ॥६४५॥

सटपटाति सैं ससिमुखी मुख घूँघट-पटु ढाँकि ।  
पावक-झर सी झमकि कै गई झरोखा झाँकि ॥६४६॥

ज्यौं कर, त्यों चिकुटी चलति; त्यों चिकुटी, त्यों नारि ।  
छबि सौं गति सी लै चलति चातुर कातन-हारि ॥६४७॥

बुधि अनुमान, प्रमान श्रुति कियें नीठि ठहराइ ।  
सूछम कटि पर ब्रह्म की अलख, लखी नहिं जाइ ॥६४८॥

खिचैं मान अपराध हूँ चलि गै बहैं अचैन ।  
जुरत डीठि, तजि रिस खिसी, हँसे दुहुनु के नैन ॥६४९॥

रूप-सुधा-आसव छक्यौ, आसव पियत बनै न ।  
प्यालैं ओठ, प्रिया-बदन, रह्यो लगाएँ नैन ॥६५०॥

यौं दलमलियतु, निरदई, दई, कुसुम सौ गातु ।  
करु धरि देखौ, धरधरा उर कौ अजौं न जातु ॥६५१॥

किती न गोकुल कुलबधू, किहिं न काहिं सिख दीन ।  
कौनै तजी कुल-गली है मुरली-सुर-लीन ॥६५२॥

खलित बचन, अधखुलित दृग, ललित स्वेद-कन-जोति ।  
अरुन बदन छबि मदन की खरी छबीली होति ॥६५३॥

बहकि न इहिं बहिनापुली, जब तब, बीर बिनासु ।  
बचै न बड़ी सबील हूँ चील-घोंसुवा माँसु ॥६५४॥

लहि रति-सुखु लगियै हियैं लखी लजौंहीं नीठि ।  
खुलति न, मो मन बंधि रही वहै अधखुली डीठि ॥६५५॥

क्रियौ सयानी सखिनु सौं, नहिं सयानु यह, भूल ।  
दुरै दुराई फूल लौं क्यौं पिय-आगम-फूल ॥६५६॥

आयौ मीतु बिदेस तै काहू कह्या पुकारि ।  
सुनि हुलसीं, बिहँसीं, हँसीं दोऊ दुहुनु निहारि ॥६५७॥

जद्यपि सुंदर, सुघर, पुनि सगुनौ दीपक-देह ।  
तऊ प्रकासु करै तितौ, भरियै जितै सनेह ॥६५८॥

पलनु प्रगटि, बरुनीनु बढि, नहिं कपोल ठहरात ।  
अँसुवा परि छतिया, छिनकु छनछनाइ, छिपि जात ॥६५९॥

फिरि सुधि दै, सुधि द्याइ प्यौ, इहिं निरदई निरास ।  
नई नई बहुर्यौ, दई ! दई उसासि उसास ॥६६०॥

समै-पलट पलटै प्रकृति, को न तजै निज चाल ।  
भौ अकरुन करुनाकरौ इहिं कपूत कलिकाल ॥६६१॥

पार्यौ सोरु सुहाग कौ इनु बिनु हीं पिय-नेह ।  
उनदौंहीं अँखियाँ ककै, कै अलसौंहीं देह ॥६६२॥

इनु दुखिया आँखियानु कौ सुखु सिरज्यौई नाँहिं ।  
देखैं बनै न देखतै, अनदेखैं अकुलाँहिं ॥६६३॥

लगी अनलगी सी जु बिधि करी खरी कटि खीन ।  
किए मनौ वै हीं कसर कुच, नितंब अति पीन ॥६६४॥

छिनकु उधारति, छिनु छुवति, राखति छिनकु छिपाइ ।  
सबु दिनु पिय-खंडित अधर दरपन देखत जाइ ॥६६५॥

मुँहु पखारि मुडहरु भिजै, सीस सजल कर छावाइ ।  
मौरु उचै घूँटेनु तै नारि सरोबर न्हाइ ॥६६६॥

कोटि जतन कोऊ करौ, तन की तपनि न जाइ ।  
जौ लौं भीजे चीर लौं रहै न प्यौ लपटाइ ॥६६७॥



चटक न छाँडतु घटत हूँ सज्जन-नेहु गँभीरु ।  
फीकौ परै न, बरु फटै, रँग्यौ चोल-रँग चीरु ॥६६८॥

दुसह बिरह दारुन दसा, रहै न और उपाइ ।  
जात जात ज्यौ राखियतु प्यौ कौ नाउँ सुनाइ ॥६६९॥

फिरि फिरि दौरत देखियत, निचले नैक रहैन ।  
ए कजरारे कौन पर करत कजाकी नैन ॥६७०॥

को छूट्यौ इहि जाल; परि, कत, कुरंग, अकुलात ।  
ज्यौं ज्यौं सुरझि भज्यौ चहत, त्यों त्यों उरझत जात ॥६७१॥

अब तजि नाउँ उपाय कौ, आए पावस-मास ।  
खेलु न रहिबौ खेम सौं केम-कुसुम की बास ॥६७२॥

लसै मुरासा तिय-स्त्रवन यौं मुकतनु दुति पाइ ।  
मानहु परस कपोल कै रहे स्वेद-कन छाइ ॥६७३॥

मिलि परछाँहीं जोन्ह सौं रहे दुहुन के गात ।  
हरि राधा इक संग हीं चले गली महिं जात ॥६७४॥

बिधि, बिधि कौन करै, टरै नहीं परै हूँ पानु ।  
चितै कितै त लै धर्यौ इतैं तन मानु ॥६७५॥

मोरचंद्रिका, स्याम-सिर चढ़ि कत करित गुमानु ।  
लखिवी पाइनु पर लुठति, सुनियतु राधा-मानु ॥६७६॥

चिरजीवौ जोरी, जुरै क्यों न स्नेह गँभीर ।  
को घटि; ए वृषभानुजा, वे हलधर के बीर ॥६७७॥

औरै गति, औरै बचन, भयौ बदनु-रँगु औरु ।  
द्योसक तैं पिय-चित चढ़ी कहैं चढ़ैं हूँ त्यौरु ॥६७८॥

बेंदी भाल, तँबोल मुँह, सीस सिलसिले बार ।  
दृग आँजे, राजै खरी एई सहज सिंगार ॥६७९॥

अंग अंग प्रतिबिंब परि दरपन सैं सब गात ।  
दुहरे, तिहरे, चौहरे, भूषन, जाने जात ॥६८०॥

सघनकुंज-छया सुखद सीतल सुरिभि-समीर ।  
मनु है जातछ अजौं वहै उहि जमुना के तीर ॥६८१॥

मोहि भरौसौ, रीझिहै उझकि झाँकि इक बार ।  
रूप-रिझाबनहारु वह, ए नैना रिझबार ॥६८२॥

भौहनु त्रासति, मुँह नटति, आँखिनु सौं लपटाति ।  
ऐँचि छुडावति करु, इँची आगैं आवति जाति ॥६८३॥

रुक्म्यौ साँकर कुंज-मग, करतु झाँझि, झकुरातु ।  
मंद मंद मारुत-तुरँगु खूँदतु आवतु जातु ॥६८४॥

जदपि लौंग ललितौ, तऊ तूँ न पहिरि इक आँक ।  
सदा साँक बढियै रहै, रहै चढी सी नाक ॥६८५॥

बरजैं दूनी हठ चढै, ना सकुचै, न सकाइ ।  
टूत कटि दुमची-मचक, लचकि लचकि बचि जाइ ॥६८६॥

कर समेट कच भुज उलटि, खएँ सीस-पट टारि ।  
काकौ मनु बाँधै न यह जूरा-बाँधनहारि ॥६८७॥

पूछैं क्यौं रूखी परति, सगिबगि गई सनेह ।  
मनमोहन-छबि पर कटी, कहै कँट्यौनी देह ॥६८८॥

सोहत ओढैं पीतु पटु स्याम, सलौनैं गात ।  
मनौ नीलमनि-सैल पर आतपु पर्यौ प्रभात ॥६८९॥

भाल लाल बेंदी, लालन, आखत रहे बिराजि ।  
इंदुकला कुज मै बसी मनौ राहु-भय भाजि ॥६९०॥

अंग अंग छबि की लपट उपटति जाति अछेह ।  
खरी पातरीऊ, तऊ लगै भरी सी देह ॥६९१॥

दृग थिरकौहैं, अधखुलैं, देह थकौहैं ढार ।  
सुरत सुखित सी देखियत, दुखित गरभ कै भार ॥६९२॥

बिहँसति, सकुचति सी, दिऐं कुच-आँचर-बिच बाँह ।  
भीजैं पट तट कौं चली, न्हाइ सरोवर माँह ॥६९३॥

बरन, बास, सुकुमारता, सब बिधि रही समाइ ।  
पँखुरी लगी गुलाब की गात न जानी जाइ ॥६९४॥

रंच न लखियति पहिरि यौं कंचन सैं तन, बाल ।  
कुँभिलानैं जानी परै उर चंपक की माल ॥६९५॥

गोधन, तूँ रहष्यौ हियैं धरियक लेहि पुजाइ ।  
समुझि परैगी सीस पर परत पसुनु के पाइ ॥६९६॥

मुँह धोवति, एड़ी घसति, हसति, अनगवति तीर ।  
धसति न इंदीबरनयनि कालिंदी कै नीर ॥६९७॥

बढत निकसि कुच-कोर-रूचि, कढत गौर भुजमूल ।  
मनु लुटि गौ लोटनु चढत, चोंटत ऊँचे फूल ॥६९८॥

अहे, दहेँडी जिनि धरै, जिनि तूँ लेहि उतारि ।  
नीकैं है छीकैं छुवै, ऐसै ई रहि, नारि ॥६९९॥

न्हाइ, पहिरि पटु डटि, कियौ बेंदी-मिसि परनामु ।  
दृग चलाइ घर कौं चली बिदा किए घनस्यामु ॥७००॥

ज्यौं हैहौं, त्यौं होउंगी हौं, हरि, अपनी चाल ।  
हटु न करौ, अति कठिनु है मो तारिबौ, गुपाल ॥७०१॥

परसत पोंछत लखि रहतु, लगि कपोल कै ध्यान ।  
कर लै प्यौ पाटल, बिमल प्यारी-पठाए पान ॥७०२॥

बामा, भामा, कामिनी, कहि बोलौ प्रानेस ।  
प्यारी कहत खिसात नहिं पावस चलत बिदेस ॥७०३॥

उठि, ठकु ठकु, एतौ कहा पावस कै अभिसार ।  
जानि परैगी देखियौ दामिनि घन-अँधियार ॥७०४॥

कैवा आवत इहिं गली रहौं चलाइ, चलै न ।  
दरसन की साथै रहै, सूधे रहै न नैन ॥७०५॥

बेसरि-मोती, धनि तहीं; को बूझै कुल, जाति ।  
पीबौ करि तिय-ओठ कौ रसु निधरक दिन राति ॥७०६॥

तिय-मुख लखि हीरा-जरी बेंदी बढै बिनोद ।  
सुत-सनेह मानौ लियौ बिधु पूरन बुधु बोद ॥७०७॥

गोरी गदकरी परै हँसत कपोलनु गाड़ ।  
कैसी लसति गवाँरि यह सुनकिरवा की आड़ ॥७०८॥

जौ लौं लखौं न, कुल-कथा तौ लौं ठिक ठहराइ ।  
देखैं आवत देखि हीं, क्यों हूँ रह्यौ न जाइ ॥७०९॥

सामाँ सेन, सयान को सबै साहि कै साथ ।  
बाहुबली जयसाहिजू, फते तिहारै हाथ ॥७१०॥

याँ दल काढे बलक तैं तैं, जयसिंह भुवाल ।  
उदर अघासुर कै परै ज्यौं हरि गाड़, गुवाल ॥७११॥

घर घर तुरकिनि हिंदुनी देति असीस सराहि ।  
पतिनु राखि चादर, चुरी तैं राखी, जयसाहि ॥७१२॥

हुकुम पाइ जयसाहि कौ, हरि-राधिका-प्रसाद ।  
करी बिहारी सतसई भरी अनेक संवाद ॥७१३॥

किसी ने इन दोहों के बारे में कहा है:

सतसइया के दोहरा ज्यों नावक के तीर ।  
देखन में छोटे लगै घाव करै गम्भीर ॥